

MAKI

Yoni tu wibapatiso a guguya

1 ¹Geka tuwega dewadewana i waawala Yesu Keliso binei, tauna Yaubada Natuna.

²Tu bahapiko gehouna gowana Isaiya Yaubada a baha i bahebaheya i pa,

‘U tu winoyanoya apo a himila tahaem po om tahaya ina wononogogeya.’

³‘Lawa gehouna hoi balabala yabayababa e iototu i pa, “Guyau a tahaya ona wononogeya.

A tahaya ona lidumaluhi.”’

⁴Uyahinei Yoni tu wibapatiso i geleta Yudeya balabalana uyahina apapoe paligigilana binei nugobui bapatisona i lauguguyeya. ⁵Lawa boluhi tupo Yudeyagei po dobu Yelusalemgei hi liya mai Yoni uyahina. Hai apapoe hi bahena geletehi ma Yoni i bapatisohi goila Yodani uyahina.

⁶Yoni a mae ega ita dewadewa babana a kaleko kamelo apalana, ma a dagilolo gamogamo opina ma a yam madimadi ma tuwoya i ananihi.

⁷Yoni a guguya Yesu binei i pa, ‘Lawana muliugei e nenei naka i gelagoniu ma ega u dewadewa awai ipa apo a polou po a aehumahuma a lupeni.

⁸Tau goilei a bapatisomi ma tauna apo Alugo Woiyawei ina wibapatisomi.’

Yesu a bapatiso

⁹Noka hougana Yesu Nasaletagei i nei Galili tuponanei. Yesu i nei Yoni uyahina po Yoni Yesu i bapatisoya goila Yodani uyahina. ¹⁰Goila uyahinei Yesu i togo geleta po yada i gagaleya ma i gunahoeya po Alugo Woiyawa mei bunebune i hopu mai tauna uyahina. ¹¹Ma pona yadei i hopu mai i pa, ‘Tam Natuwe a luhogalem, ma bimgei a kaoha’.

Yesus a ludadana

¹²Naka hougana Alugo Woiyawa Yesu i himili po i nae balabala yabayababa uyahina, ¹³po noka hota i memae iyeta magouhi 40, ma

Tomodulele Yesu i laudadani. Ma balabalana uyahina gamogamo woyahiyahihi hai ani mae ma tu winoyanoya mi yadena Yesu hi galena iteteya.

Yaubada a taniwaga ina wawala

¹⁴Heloda Yoni i numa panipani po hoi numa panipani i houni, ma u mulina Yesu i nae tupo Galili uyahina po tuwega dewadewana i guguyeya Yaubada uyahinei i pa, ¹⁵‘Houga amaka i geleta Yaubada a taniwaga kikina apo ina wawala, uyahinei omi apapoe uyahihiyei ona luhagawilemi po tuwega dewadewana nugonugomiyei ona witumaganeya’.

Yesu a hewahewali wohepali i otugehi

¹⁶Iyeta gehouna Yesu Galili bogana liyaliyanei i nena po tu ebaebaga luwaga i tuhagahi, tauhi hi ebebaga. Gehouna gowana Simona ma walehina gowana Andulu ¹⁷Ega yaka Yesu i otugehi i pa, ‘Ona wimulitagou po lawa ebagahi a wiatatiyemi’. ¹⁸Ega yaka hai hagida hi nehalehi ma Yesu hi wotagoya.

¹⁹Ma i tutunae po Sebedi natunatuna luwaga Yamesa ma a tewela Yoni i galehi tauhi hai hagida hi wononogo wam uyahina. ²⁰Naka hougana Yesu i otugehi i pa, ‘Ona wimulitagou’. Ma hi towolo yagiyagina po amahi ma a tu bagibagi mitehi hi nehalehi hai wam uyahina ma Yesu hi wotagoya.

Lawa gehouna alugo apapoena u hinena

²¹Yesu i nae Kapaneum u meyageina. Iyeta dalabu uyahina hi lui hoi numa dalabu po Yesu i wiatatiyana. ²²Ma lawa hi nugogohola duma a wiatatiyana binei babana a baha hi wipoya ipa lawa hina wotagoya. Ma ega mei lugagayo tanitaniwagahi hai wiatatiyana.

²³Naka hougana lawa gehouna alugo apapoena u hinena i memae ma i otu i pa, ²⁴‘Yesu tam Nasaletagei. Awai ipa uyahiyai una dewaya? U nenei ipa una wiapapoeniyai? Ma a hanapugem tam iyai. Tam Yaubada galinei waiwoyawam.’

²⁵Yesu i paliyeya i pa, ‘Una genuwana ma una nehaleya!’ ²⁶Yesu i baha yaka alugo apapoena lawana i tapeitatawa dumaya ma i otu labatana apoma lawana i nehaleya.

²⁷Lawa atapuhi hi gohola dumahi po tunawahi hi lulubayadena mehi hi pa, ‘Geka awai? Geka nugote wiatatiyana wouna. Tauna a wipoyagei alugo apapoehi i taniwagehi po hi wiponawogogeya.’ ²⁸Noka hougana Yesu tuwegana hi nohaya meyagai atapuhi uyahihi Galili u tuponana.

Yesu lawa hai totogo i widewadewahi

²⁹Kapaneum numa dalabuna hi hopu haleya po hi nae Simona ma Andulu hai numa uyahina ma gasi Yamesa ma Yoni mitehi. ³⁰Hi geleta

po Yesu hi paliweleya hi pa, 'Simona pohiyana i wihinigugupouma po ani eno uyahina e'neno'. ³¹Yaka Yesu i nae Simona pohiyana uyahina po u nimana i wogo po i witowoli. Ma a gupouma i kokoe. I wotowolo po i poulehi.

³²Kabudala i yoli po i uguguwi ma lawa tootogohi po tauhi alugo apapoena i luiluinhi hi nehi mai Yesu uyahina. ³³Tauhi meyageinei hi nei po numa u liyaliyana hi towolo. ³⁴Yesu lawa hai totogo tapuhi po tapuhi i luyawahihi ma alugo apapoehi i wiyagahi ma i paliwelehi ipa hina genuwana po Yesu ega hina palipaligeleteya.

Yesu i guguya u Galili

³⁵Yesu numa i nehaleya po i weludidibala nae hoi balabala po tunawana i laupali. ³⁶Simona a lawa mitehi hi'mhoe po hi nae Yesu hi biheya. ³⁷Hougana hi tuhagaya po hi paliweleya hi pa, 'Lawa atapuhi he bibihem'.

³⁸Ma Yesu i baha i pa, 'Amaka ma ta nae dobu gehouhi uyahihi po a guguya. Geka bagibagina binei a nei.' ³⁹Ma ega yaka Galili atapuna hi wiwileya po i guguya hai numa dalabu uyahihi ma alugo apapoehi i wiyagahi.

Yesu lepelu lawana i widewadeway

⁴⁰Lawa lepelepelona i nei Yesu uyahina po i polou ma i baha gonugonuwa i pa, 'Inapa nugonugom yaka una wiluyagohaniu'.

⁴¹Yesu i lunugotootogogeya yaka nimana i lodomi po lawana i wodadani ma i pa, 'Nugonugou a luyawahim. Amaka ma una dewadewa.'

⁴²Mala emosi ma a lepelu i kokoe ma i dewadewa meme.

⁴³Naka hougana Yesu i himihimili ma i baha kadidili uyahina i pa, ⁴⁴'Ega lawa gehouna una palipaliweleya, ma una nae tu witalaguyaba uyahihi po una bahena mem una pa, "Amaka a dewadewa", ma om ani'mbenena una houni mei Mose a lugagayo bukana uyahina i gilugilumi pite om yeuye binei po hina hanapugem tam amaka u luyagohana'. ⁴⁵Ma lawana Yesu a lugagayo ega ita wiponawogogeya ma i nae po lawa boluhi uyahihi i ibaabaniyeya. Uyahinei Yesu ega emoemotana ina nae meyagai uyahihi babana lawa hi maga дума po hoi balabala i memae, ma lawa tupo atapunei hi nenei Yesu uyahina.

Yesu aeapapoe lawana i luyawahi

2 ¹Iyeta wabihaga hi kokoe ma Yesu i gunawileya Kapaneum po hoi numa i memae ma tuwegana lawa hi nonoli. ²Ma bolu baneina hi'mboina nae po numa hinena matetana hi wihogoya, ma Yesu i guguya uyahihi. ³Lawa wohepali lawa waigwameyameyana hi awali po hi nei hoi numa ma ega emoemotahi po hina lui babana numana i hogoya. ⁴Ega

yaka tetegei hi'mgeina gae wogo tabataba uyahina ma numa gatowana hi hoeya, ma tu totogo anai ani enona ma hi houna hopuneya Yesu u matana. ⁵Hougana Yesu lawahi hai witumagana i gagaleya po i baha nae totogo lawana uyahina i pa, 'Natuwe, om apapoe amaka a paligigilihi'.

⁶Ma lugagayo tanitaniwagahi Yesu a baha hi nonoli ma u nugonugohi hi nugowilawila hi pa, ⁷'Awai binei geke lawana Yaubada e palipaliguyoguyougeya? Ega emoemotana lawa awai apapoe ina paligigili ma Yaubada tunawana.'

⁸Mala emosi ma Yesu u nugonugona hai nugotuhu gowagowada i lugeleteya yaka i baha nae uyahihi i pa, 'Awai binei o inugowilawila? ⁹Meka baha dewadewana po apo tu tootogona a paliweleya? Om apapoe a paligigili bo una towolo po om ani eno una waya po una nae? ¹⁰Apo uyahimi a limoineya naka tau Lawa Moinau, wipoya Yaubada i weleu po hoi hipuli apapoe a paligigili.' Ega yaka i baha nae lawa waigwameyameyana uyahina i pa, ¹¹'A bahabaha uyahim, una towolo po om ani eno una awali ma una nae om meygai uyahina.' ¹²U matahi ma i towolo po anani eno i awali po i nae, ma lawa atapuhi nugonugohi hi goholihi ma Yaubada hi wotalagiyeya hi pa, 'Geke mala emosi hota apoma ta galeya'.

Libai Yesu i wotagoya

¹³Yesu i gunawilena meya Galili u bogana ma bolu baneina hi'mboina mai uyahina po i wiatatiana uyahihi. ¹⁴Ma i nena po lawa gowana Libai amana Alipi, naka lawana tauna takisi tu tama anani bagibagi numana uyahina i tugutugula ma Yesu i baha nae uyahina i pa, 'Una wotagou'. Libai i towolo po Yesu i wotagoya.

¹⁵Houga naka uyahina Yesu mitehi hi tugula Libai anu numa po hi'mam, ma takisi tu tama po tu apapoe po Yesu a hewahewali mitehi hi tugutugula babana lawa magomagouhi Yesu hi wotagoya. ¹⁶Ma lugagayo tanitaniwagahi naka tauhi Palisi lawahi hi gagaleya tu apapoe po takisi tu tama mitehi hi'mam ma a hewahewali hi lubayadehi hi pa, 'Awai binei omi bada takisi tu tama po tu apapoe mitehi he'mam?'

¹⁷Yesu hai baha i nonoli yaka i paliwelehi i pa, 'Lawa ega hita tootogo ega tu lumulamula nugonugohi ma tu tootogo tauhi nugonugohi tu lumulamula. A nenei ega ipa tu dewadumalu a otugehi, ma tu apapoe a otugehi po hina nugobui.'

Tapalolo hudina

¹⁸Houga gehouna Yoni tu bapatiso a hewahewali po Palisi lawahi hai tapalolo uyahina aniani atapuhi ega hita ananihi babana hi hudihudi. Ma Yesu a hewahewali ega hita hudihudi. Lawa gehouhi hi nei Yesu uyahina po hi lubayada hi pa, 'Awai binei Yoni po Palisi hai hewahewali he hudihudi ma tam om hewahewali ega hita hudihudi?'

¹⁹Ma Yesu i'mpaliluwaluwa i pa, 'Itapa tu tawine olotona a tawine tolehana uyahina tauna ita memae, moina apo a toumana hita iyohi? Apega. Hougana tu tawine olotona mitehi hina memae apega hina iyohi. ²⁰Tamogi iyeta he nenei apo tu tawine olotona a gawiya hina wihaleya ma noka iyetana uyahina apoma apo hina wiyohi.'

²¹Ma i baha meme uyahihi i pa, 'Ega iyai luilui wouna ita papaya po luilui odubona uyahina ita hilahilama lawiteya. Inapa ina dewaya yaka naka luiluina wouna amaka i wiapapoeya ma apo gunalolona ina lata. ²²Ma ega iyai wine wouna ita hiwohiwoga hopuneya talagigoila gamogamo opihiyei hi dewadewaya odubona uyahina. Inapa ina dewaya yaka apo winena wouna ina hahana po talagigoilana ina gunahaiya po wine ina kolologeya. Apega iyai ina dewaya. Tamogi wine wouna ipa talagigoila wouna uyahina hina hiwohiwoga hopuneya.'

Yesu Dalabu i taniwageya

²³Dalabu gehouna Yesu a hewahewali mitehi yaniyani mei pegapega tanona tipolinei hi nena, ma a hewahewali hi nae po pegapega ugohi hi'mgomogomu po hi'mam. ²⁴Ma Palisi lawahi hi gagalehi po hi pa, 'Una galeya. Ata lugagayo i baheya ipa ega hoi dalabu ta wobagibagi ma om hewahewali geke pite he dewadewaya.'

²⁵Ega yaka Yesu i paliwelehi i pa, 'Dawita po iyawoi tauna mitehi am hi hilage ma awai i dewadewaya o hiyawa bo eega? ²⁶Naka hougana Abiyata tu witalaguyaba taniwagana Dawita i lui po Yaubada a numa u hinena palawa wailugagayona i waya po i ani, ma a hewahewali i welewelehi. Tamogi ata lugagayo i baheya ipa ega iyai ina anani ma tu witalaguyaba tunawahi.'

²⁷Ega yaka Yesu i baha i pa, 'Yaubada iyeta dalabu lawa i welewelehi tauhi galihiyei, ma dalabu ega lawa ita tanitaniwagehi. ²⁸Tau Lawa Moinau dalabu taniwagana.'

Lawa nimana habehabeluna

3 ¹Yesu i gunawileya numa tapalolo uyahina po lawa nimana habehabeluna i memae ma i galeya. ²Ma Palisi lawahi tahaya hi bibeiha ipa Yesu hina wigouya po hi todi ma hi gagaleya hi pa, apo dalabugei lawana ina luyawahi bo eega. ³Ega yaka Yesu lawana nimana habehabeluna i otugeya i pa, 'Una nei geke u tipolinana.'

⁴Ma Yesu i pa, 'A lubayademi, ata lugagayo uyahina i baheya ipa hoi dalabu awai ta dewadewaya? Lawa tana idewadewahi bo tana iapapoenihi, bo lawa ta lauyawahihhi bo ta ununihhi?' Ma hi genugenuwana.

⁵Yesu anai uyogigeina i gagalena wilawila uyahihi ma nugonugona i wiyuwa duma babana ega hai lunugotootogo, ega yaka lawana uyahina

i pa, 'Nimam una lodomi', ma nimana i lodolodomi po i dewadewa. ⁶Uyahinei Palisi Heloda hai bolu mitehi hi wiwogatala hi pa, apo iyowai ma Yesu hina lihilageni.

Bolu baneina boga u liyaliyana

⁷Houga gehouna Yesu a hewahewali mitehi hi hopu Galili u bogana ma bolu baneina hi wotagohi. ⁸Bolu geke dohuhigei hi nenei naka tupo Galili ma Yudeya ma Yelusalemgei hi nei, Idumeya tuponana uyahinei hi nei, Yodani goilana u tuponanei hi nei, ma gasi meyangai baneihi, Saidoni ma Taya u liyaliyahigei hi nei. ⁹Ma bolu i lata duma yaka i baha nae a hewahewali uyahihi i pa, 'Wam ona neiyai ma lawa he pitapita mehi ma hoi wam apo a gelu. ¹⁰Babana Yesu tu tootogo uyahihi i wobagibagi. Ma lawa hi pitapita mehi po Yesu hi wodadani. ¹¹Bolu u hayahi lawa gehouhi alugo apapoehi hi luinihi ma Yesu u matana hi polopolou ma hi ototu hi pa, 'Tam Yaubada Natuna'.

¹²Ega yaka Yesu i paliwelehi i pa, 'Ega ona palipaligeleu lawa uyahihi'.

Yesu a hewahewali i winaganihi

¹³Yesu a bagibagi u boga i luwegahi ma i gae u oya, po bolu uyahihiyei lawa i lauhogalehi i otugehi po hina nae uyahina. ¹⁴Ma magouhi 12 i witowolihi ma i wigowahi tu wituwetuwega ipa apo mitehi hina memae po ina himilihi tupo gehouhi uyahihi po hina luguguya. ¹⁵Ma hai wipoyagei apo alugo apapoehi lawa uyahihi hina wihalehi. ¹⁶Yesu a hewahewali magouhi 12 i naganahi gowahi gegeka: Simona, Yesu i wigowaya Pita, ¹⁷Yamesa ma walehina Yoni tauhi Sebedi natunatuna, ma Yesu i igowahi Palele natunatuna, tauhi ponahiyei i baheya Bowanati, ¹⁸Andulu, Pilipo, Batolomiu, Matiu, Tomasi, Yamesa Alipi natuna, Tadiyesi, Simona tauna tu'mgudugudu mi Loma hai ani taniwaga uyahinei, ¹⁹ma Yudasa Isakaliyota Yesu tu nugohalenana.

Yesu a kadidili

²⁰Yesu a hewahewali mitehi numa gehouna uyahina hi lui ma bolu gehouhi hi'mboina mai po ega emoemotahi hin'omagotupo babana lawa hai gaogo ega hita welehi. ²¹Yesu a guguni noyana hi nonoli po binei hi nae po ipa hina weluwaya, babana lawa hi baheya hi pa Yesu ita badebade.

²²Ma lugagayo tanitaniwagahi Yelusalemgei hi hopu mai po hi paliguyouguyageya hi pa, 'Ega naka tauna a kadidiligei ita wobagibagi ma Tomodulele, palouma hai bada, a manini uyahinei alugo apapoehi e iyagahi'.

²³Yesu lugagayo tanitaniwagahi hai baha i nonoli, yaka paliluwaluwegei i baha nae uyahihi i pa, 'Omi bahahi ega baha dumahi.

Awai binei apo palouma tulana ina wigawiyeya? Tauna tulana. ²⁴Apo ani taniwaga gehouna u tipolina ina gunakahaya po hina igawigawiyena mehi apo hai mae ina apapoe. ²⁵Apo gasi guguni emosi ma u tipolina ina gunakahaya po hina igawigawiyena mehi, apo hai gugunina ina apapoe. ²⁶Uyahinei ma inapa Tomodulele anani taniwaga ina gunakahaya po hina igawigawiyena mehi apo hai boluna apega ina kadidili ma apo hina kokoe. ²⁷Ega emoemotana lawa kadikadidilina a numa ta luyia po a gapola ta danenehi. Inapa numana taniwagana ta womomohi po aena ma nimana ta panipanihi yaka apo ta lui a numa u hinena po a gapola ta danenehi. ²⁸A baha duma uyahimi, lawa hai apapoe po hai baha apapoehi Yaubada emoemotana apo ina paligigilihi. ²⁹Ma apapoe emosi hota, inapa lawa awai Alugo Woyawa ina paliguyoguyougeya yaka tauna apega Yaubada ina paligigili ma a apapoe apo ina mewahaga.'

³⁰Yesu geka i bahabaha nae matababana lawa hi wigouya hi pa, tauna alugo apapoena i luyia.

Hinana ma walewalehina hi geleta Yesu uyahina

³¹Hinana ma walewalehina hi geleta Yesu uyahina po numa u uputana hi towotowolo ma Yesu hi giigimeya ipa ina hopu uyahihi. ³²Bolu Yesu u liyaliyana hi memae hi paliweleya hi pa, 'Hinam ma walewalehim hoi uputa he bibihem'.

³³Yesu hai baha i wimiheya i pa, 'Hinau iyai? Ma walewalehiu iyawoi nawa?'

³⁴Ma bolu i galehi ma i baha i pa, 'Geka taumi hinahinau po walewalehiu. ³⁵Apo iyai Yaubada a nugotuhu ina dewadewaya, naka tauna walehiu po nouwe po hinau.'

Yesu i'mpaliluwaluwa pehi binei

4 ¹Yesu i gunawileya Galili u bogana ma i wiwawala po i guuguya ma bolu banei dumana hi'mboina mai uyahina, ega yaka Yesu wam uyahina i gelu po i tugula imahi ma bolu hoi dedeyani hi towotowolo. ²Ma ega yaka baha wiluwaluwagei i wiyatatiyehi i pa, ³'Ona lutanigana, tu lupehi i nae a tano uyahina po a pehi polahi i nohanohahi. ⁴I ihulu po pola gehouhi hoi tahaya hi peu po kiu hi anihi. ⁵Ma pola gehouhi hi peu dobu waigaigaimana uyahina po hi laha yagiyaginehi babana hipulina ega ita potopoto. ⁶Ma kabudala a houga lalana uyahina mala emosi ma hi kokodila, babana dedehi ega hipuli dewadewana hita tuhagaya. ⁷Ma pola gehouhi hiyamoni waidonadonana u hayahi hi peu po houkana hi lahalahahi naka donadona i numa panipani unihi. ⁸Ma pola gehouhi hipuli dewadewana uyahina hi peu po hi lata po hi ugo. Hai houga ugo naka gehouhi ega hit'ugo imahi ma gehouhi ega hit'ugo duma. Ma gehouhi hi ugo labatana.'

⁹Uyahinei Yesu i pa, ‘Taumi iyawoi waitanigami yaka ona launonola.’

Awai binei Yesu i bahabaha wiluwaluwa

¹⁰Yesu a guguya i luwegahi po bolu hi'mtuihagola ma a hewahewali po tu wotagona gehouhi mitehi hi memae po hi lubayada hi pa, ‘Nugonugoiyai ipa om baha wiluwaluwa una liyayahihi uyahiyai’. ¹¹Yesu hai baha i wimiheya i pa, ‘Taumi amaka Yaubada anani taniwaga anona i lugeleteya uyahimi. Ma tauhi tu meuputa baha wiluwaluwa geka hi nonoli ma anona ega hita hanapugeya. ¹²Geka binei ma baha wiluwaluwagei i iatatiyana babana, ‘Apo hina wihalugeya ma apega hina galena tuhagaya po apo hina lutanigana ma apega hina hanapugeya. Ma itapa hita hanapugeya apo hai apapoe hita wihinigiyehi po Yaubada ita paligigilihi.’”

Pehi paliluwaluwana anona

¹³Yesu i lubayadehi i pa, ‘Pehi paliluwaluwana ega ota hanapugeya? Yaka baha wiluwaluwa gehouhi apega ona hanapugehi. ¹⁴Tu wihulu Yaubada a baha e laiholi lawa u nugonugohi. ¹⁵Pola hoi tahaya hi pipeu naka lawa Yaubada a baha hi nonoli ma Tomodulele bahana u nugonugohi i wihaleya. ¹⁶Ma pola dobu waigaigaimana uyahina hi pipeu, anona naka iyawoi Yaubada a baha anai kaohahi hi nonoli, ¹⁷tamogi ega dedehi uyahinei ma he itumagana po ega daona ma witai po pilipili he wialonihi naka bahana binei ma amaka he peu. ¹⁸Pola hiyamoni waidonadonana u hayahi he pepeu anona naka lawa Yaubada a baha hi nonoli ¹⁹ma tamogi hipuli genona ma gapola wasawasahi nugohi i waya po tauhi hai luhogala gowagowadagei bahana hi winugoguluwi po ega ugohi. ²⁰Ma pola hipuli dewadewana uyahina hi pipeu anona naka lawa tauhi baha hi nonola tuhagaya yaka apo hin'ugugo. Gehouhi ega hit'ugo imahi, gehouhi naka hi ugo duma ma gehouhi hi ugo labatana.’

Paliluwaluwa lampa binei

²¹Yesu a baha wiluwaluwa gehouna yayata omgowadana binei, i baha i pa, ‘Ega iyai lampa ita apuya ma gaebagei ita lautataya bo ani eno u gaboulina ita huhouni, tamogi anani tugula uyahina e huhouni. ²²Awai gowagowadana apo ina wihabuhabuluna po lawa hina nonoli. Ma awai gowagowadana apo hina tuhagaya po hina neiyai hoi yayata po lawa hina galey. ²³Taumi iyawoi waitanigami yaka ona launonola.

²⁴‘Iyawoi o lautanigana ipa ona gagalena imahi. Babana awai o dewadewaye apo Yaubada bimiyei ina dewaya po ina luwitani. ²⁵Matababana iyai uyahina awai dewadewana e memae apo Yaubada ina luwitani tauna uyahina. Ma iyai uyahina eega, awai habuluna e memae apo Yaubada ina wihaleya.’

Paliluwaluwa pehi lahana binei

²⁶Yesu i baha i pa, ‘Yaubada anani taniwaga naka mei pehi lawa a tano uyahina i ugohi, ²⁷ma uguwei lawana i eno po malatomtongei i towotowolo po pehihi hai laha po hai lata a baba ega ita hanapugeya. ²⁸Hipuli tauna tu wilata lugu ma ugo hai dewadewa tu welehi, ²⁹ma a houga magula uyahina apo ugonana hina lohi.’

Paliluwaluwa pola habuluna binei

³⁰Yesu i baha meme i pa, ‘Yaubada anani taniwaga galenana awai? Ma apo awai uyahina a paliluweluweya? ³¹Galenana mei ihagila polana habuluna, ³²ma apo lawa e ugohi po e lahaya po e lata ma lagalagana baneihi e hounihi ma kiu hai pata he wogowogohi.’

Yesu a paliluwaluwa hi maga duma

³³Yesu a guguya uyahina paliluwaluwa hi maga duma ma uyahihiyei Yaubada a baha i bahebaheya lawa uyahihi ma awai lawa emoemotahi po hina hanapugeya naka tauna Yesu i luwaluwageya. ³⁴A luguguya lawa uyahihi houga magomagouna ompaliluwaluwagei i iatatiyana ma a hewahewali uyahihi i palipaligeletehi paliluwaluwahi anohi.

Yesu a taniwagagei togowa ma guletutu i palidumolihi.

³⁵Ibigei a hewahewali i paliwelehi i pa, ‘Ta gelu po ta woe damana u tupona’. ³⁶Hi gelu ma bolu hoi gadowa hi nehalehi po hi yamkuka ma wam gehouhi gasi hi wotagohi. ³⁷Hi'mkuka po hi damadamana ma togowa a guletutuna hi wiyaloni po guletutu i hulugeleteya wam u hinena ma apo hita yoli. ³⁸Ma Yesu wam u mulina i eneno ma a hewahewali hi limaamahi po hi pa, ‘Bada, ega uta genogeta, kikina ma apo ta hilage’.

³⁹Yesu i welutowolo po togowa ma boga anai guligulina i paliyehi i pa, ‘Amaka ma ona todi’, po ega yaka togowa i todi ma noka houkana dumola baneina.

⁴⁰Ma a hewahewali i paliwelehi i pa, ‘Awai binei o matomatouta? Yohola ega Yaubada ota witumaganeya?’

⁴¹A hewahewali hi matouta duma, ma tunawahi hi lulubayadena mehi hi pa, ‘Geka lawana awai? Togowa po guletutu he iponawogogeya.’

Lawana alugo apapoehi hi nehaley

5 ¹Galili bogana u tuponei dobu gowana Gelasene apoma uyahina hi lugeleta. ²Yesu wamgei i huhopu po badebade gehouna alugo apapoehi hi luiluiya kokowagagei i nei po mitehi hi witutuhaga. ³⁻⁴Lawana i memae kokowaga domohi uyahihi. Ma lawa hi letaya

ipa gulawa pawapawasigei aena po nimana hina panipanihi ma ega emoemotahi matababana i lautuinihi ma i lowo po u pitapita i memae ma ega emoemotana po hina womomohi. ⁵Ma iyeta po uguwa hoi kokowaga po hoi oya i ototu nae ma hinina gaima kamkamna uyahinei i hapihapihi.

⁶Ma lawana i galena nae po Yesu i galeya ma i bulili po u matana i tupeu ma i polou. ⁷Ega yaka lawana i otu labatana i pa, 'Yesu, Yaubada Gegewahagana Natuna tam. Awai uyahiu una dewaya? Ipa Yaubada gowanei una paligubau ega una ihiniwiyuwau.' ⁸Geka bahana i bahebaheya babana Yesu amaka i baha nae uyahina i pa, 'Alugo palopaloumam, lawana una hopu haleya!'

⁹Ma Yesu i lubayadeya, i pa, 'Gowam iyai?'

Ma i pa, 'Gowau Bolu, babana boluiyai to memae'. ¹⁰I lupali hihigihigili i pa, 'Ega tupo geke uyahinei una iyagiyai'.

¹¹Ma polo boluhi oya u hadana hi banibani, Yesu u liyaliyana.

¹²Alugohi hi lupali gonugonuwa hi pa, 'Una himiliyai po polo uyahihi to lui'. ¹³Ega yaka Yesu i palihalehi po alugo apapoehi lawana hi hopu haleya po polohi hi luinihi. Polo magouhi mei tausana luwaga naka pitenana ma atapuhihi oyana yapanei hi haha hopu po bogana uyahina hi halele.

¹⁴Ma polo tu galena itetehi hi lowo po hi nae dobu baneina po pitapita tu miyehi uyahihi hi wibenabenama awai hi gelegeleta. Apoma lawa hi hopu po hi nae ipa awai i waawala hina galeya. ¹⁵Lawa Yesu uyahina hi geleta. Ma lawana alugo apapoehi boluhi hi nenehaleya hi tuhagaya Yesu aena u labena i tugutugula. Tauna i lukaleko po nugonugona a dumadumaluna ma hi gagaleya po hi matouta. ¹⁶Lawahi Yesu a bagibagi hi galeya po hi wituwega hi pa, 'Alugo apapoehi lawa hi hopu haleya po hi lui polo uyahihi, po hi yoliyoligehe'. ¹⁷Yaka hi lupali gonugonuwa Yesu uyahina ipa tupo noka ina nehaleya.

¹⁸Hougana Yesu ipa hoi wam ina gelu ma lawana alugo apapoehi hi hopuhopu haleya i baha gonugonuwa Yesu uyahina ipa mitehi hina nae. ¹⁹Yesu a baha i wimiheya i pa, 'Eega, ma tamogi una nae om meyagai uyahina po om guguni una paliwelehi Guyau i lunugotootogogem po i hagum'. ²⁰Yaka lawana i nae a tupo uyahina dobuna gowana Dekapoli, po i wituwega po lawa hi nonoli ma hi gohola dumahi.

Yesu wiwine luwaga i widewadewahi

²¹Yesu a hewahewali mitehi hi damana meme hai u tupo po bolu hi'mboina meme gadowa uyahina. ²²Apoma numa dalabu taniwagana gowana Yailo i nei Yesu uyahina po u aena i polou, ²³ma i lupali gonugonuwa i pa, 'Natuwe wawinena kikina ma apo ina hilage. Ma a luhogalem ipa una nei po una wodadani po ina luyagohana ma ina memae.'

²⁴Ega yaka hi nena e a numa uyahina ma bolu baneina hi wotaghi po hi tataliyana mehi. ²⁵Ma noka boluna u hinena wawine gehouna tootogona. Tauna a totogo naka tala i kolokololo bolima magouhi 12. ²⁶Wawine geka tu ulaula gehouhi uyahihi a gapola i halehi po ipa luyagohana ina tuhagaya po ega ma tamogi a totogona i lalata. ²⁷Tauna Yesu tuwegana i nonoli yaka i wimulitagoya po a kaleko i wodadani. ²⁸Babana wawinena a nugotuhu i pa, 'Apo Yesu a kaleko a wodadani yaka a luyagohana', ²⁹Yaka wawinena Yesu a kaleko i wodadani po mala emosi ma talana a kololo i wohouna ma mayana i wimeya amaka i dewadewa.

³⁰Yesu mayana i wimeya naka manini i hopuhopu yaka i luhagawileya po i lubayada, i pa, 'Iyai u kaleko i wodadani?'

³¹Ega yaka a hewahewali hi paliweleya hi pa, 'Heki, bolu una galey a, he tataliyana mehi. Awai binei e laubayada upa iyai i wodadanim?'

³²Ma ega yaka Yesu tauna i itotolana lawa u hayahi ipa ina galey a iyai i wodadani. ³³Ma wawinena i hanapugeya tauna i dewaya yaka i matouta po i taatawa ma i nei Yesu u matana po i polou po i wibenabena ma i pa, 'Tau a wodadanim'. ³⁴Yesu wawinena i paliweleya i pa, 'Natuwe, om witumagana i wiluyagohanim; a nugodumolam una nae, om wiyuwa i kokoe.'

³⁵Yesu yohola geka bahana i bahebaheya ma Yailo a numagei lawa gehouna i nei po Yailona uyahina i baha i pa, 'Natum amaka i hilage ma ata bada ega una laigeno gawahi'.

³⁶Yesu noya i nonoli ma Yailo i paliweleya i pa, 'Ega una matomatouta tamogi una witumagana'.

³⁷Ega yaka Yesu lawa atapuhi i talagagalihi po ega hita wotagohi ma Pita ma Yamesa walehina Yoni tunawahi i weluwinihi po mitehi hi nae Yailo a numa uyahina. ³⁸Hougana hi gelegeleta meyagai uyahina ponapona hi nonoli naka lawa hi tutou po hi lauhiyawa. ³⁹Ega yaka Yesu i lui numa u hinena po tu tou i paliwelehi i pa, 'Awai binei o tutou ma o lauhiyawa? Tewela geka ega ita hilage ma e eneno.' ⁴⁰Geka bahana uyahina ma lawa atapuhi hi winameya.

Ma Yesu i baha po lawa atapuhi hi huhopu numa hinenei po hi nae hoi uputa. Ma tewelana hinana ma amana ma gasi a hewahewali tonuga mitehi hi lui po hi nae tewelana anu ani eno. ⁴¹Yesu tewelana u nimana i wogo ma ponahiyei i baha i pa, 'Talida kum', ponatiyei a bui i pa, 'Kenuna una towolo'. ⁴²Ma tewelana i wotowolo po i nae, babana a bolima magouhi 12. Amana po hinana ma a hewahewali hi galey a ma hi nugogohola duma. ⁴³Yesu i lugagayogehi i pa, 'Ega lawa gehouhi ona palipaliwelehi u bagigabi geka binei, ma tewela a yam ona weleya po ina am'.

Mi Nasaleta Yesu hi wihinigiyeya

6 ¹Yesu a hewahewali mitehi hi gunawilehi a meyagai duma uyahina, ²po Yesu hoi dalabu i wiwawala po i wiatatiyana hoi numa tapalolo.

Ma lawa magomagouhi hi nonoli po nugonugohi hi goholihi hi pa, 'Meka hotanana a hanapu i tuhagaya? Iyai i wiatatiyeya, po manini e dewadewayā? ³Geka Maliya natuna, tauna kamda, walewalehina Yamesa, Yosa, Yuda ma Simona po nounouna mitehi ta memae.' Uyahinei Yesu hi luhinidoodoleya.

⁴Ega yaka i paliwelehi i pa, 'Tu bahapiko u tupo geha lawa hi wiyateyateya ma a meyagai po a guguni po a manago ega hita wiyateyateya'. ⁵⁻⁶Yesu i nugogohola duma babana a lawa ega hita witumagana uyahina po ega emoemotana a wipoya atapuna ina haleya, yaka lawa ega hita maga ma i wodadanihi po hi luyagohana.

Yesu a hewahewali i himilihi po hina bagibagi

Ega yaka Yesu i wiwila meyagai gehouhi uyahihi po i wiatatiyana. ⁷Apoma Yesu a hewahewali magouhi 12 i otugehi po hi nei uyahina ma i paliwelehi ipa luwaga luwaga hina nenaē. Ma wipoya i welehi ipa alugo apapoehi lawa uyahihi hina iyagahi.

⁸Hai ututu i lawihi i pa, 'Ega awai ona wiwaya omi kadau binei. Ega aniani po ega poha po ega mone, ma omi digona yawa ona waya. ⁹Omi ae humahumagei ae yapayapami ona humahi ma ega luilui wiluwagana ona wiwaya. ¹⁰Apo ona nenaē meyagai gehouna uyahina ona gelegeleta ma numa taniwagana ina otugemi a numa uyahina ona lui, yaka naka numana ega ona nenehaleya, ma uyahina ona memae po a sigana meyageina ona nehaleya. ¹¹Ma inapa meyagai gehouna uyahina lawa ega hina kaohemi po omi guguya hina wihinigiyeyā yaka meyageina ona nehaleya. Ma ona nenaē hougana aemi dubudubuna ona lihooholi po ani galena u matahi ona dewaya po hai dewa apapoehi hina hanapugehi.'

¹²Yesu a hewahewali i himilihi po hi nae meyagai uyahihi po hi guguya ma lawa hai apapoe uyahihiyei hina nugobui. ¹³Gasi alugo apapoehi lawa uyahihi hi wiyagahi ma bunama uyahinei tu tootogo hi bunamihī po hi luyagohana.

Yoni tu bapatiso a hilage

¹⁴Yesu a wipoya tuwegana hi nohaya tupo atapuna uyahina po Heloda wasawasa i nonoli. Ma lawa gehouhi hi pa, 'Nugote Yoni tu bapatiso hilage uyahinei i towolo meme po manini geka e dewadewahi'.

¹⁵Ma lawa gehouhi hi pa, 'Tu bahapiko odubona Elaisiya i gunawilena meya'.

Ma lawa gehouhi hi pa, 'Ega Elaisiya ma nugote tu bahapiko odubona gehouna'.

¹⁶Ma Heloda wasawasa Yesu a wipoya noyana i nonoli po i pa, 'Baha dumana Yoni tu wibapatiso gadouna a boliboli tauna hilagei i towolo meme'.

¹⁷Babana tauna Yonina lolowa Heloda i baha po hi numa panipani po hoi numa panipani hi houni. A lui babana wawine gowana Helodiyasi naka Pilipo agona ma tamogi Heloda i'mhalohalo po walehina agona i lawagi. ¹⁸Uyahinei Yoni i gagaleya po ega ita dumalu yaka i baha nae Heloda uyahina i pa, 'Ega ita dumalu babana walehim agona u lawagi'. ¹⁹Naka binei ma Helodiyasi i luuyogigai Yoni uyahina po ipa Yoni in'uni. Ma ega emoemotana, ²⁰babana Heloda Yoni i matuteya po i galena teteya babana i hanapugeya naka Yoni tu dumalu po tu wiwoiyawa. Houga magomagouna Heloda Yoni a guguya i nonoli ma i launugoluwaluwaga tamogi ipa hilaki Yoni ponana ita noonoli.

²¹Heloda a houga guni iyetana ma agona a gaogao i tuhagaya ipa Yoni ina hilage. Tolehana hi dewaya po toumana hi otugehi am binei. Toumanahi gabemani tanitaniwagahi po gawiya tu tahaehi po Galili tupona tanitaniwagahi. ²²Hougana Heloda a toumana mitehi hi'mam ma mahiyana wawinena i lui po u matahi i halahala ipa i laikaohahi.

Tewelana a hala hi gagaleya po hi kaoha duma yaka Heloda mahiyana i otugeya po i baha uyahina i pa, 'Ani'mbenena apo a welem? Awai om luhogala?' ²³Ma wasawasa i baha i pa, 'Moina dumana a baha gwala uyahim om luhogala awai apo a welem. Inapa ani taniwaga una luhogaleya emoemotana apo tupo gehouna bimegei a palihaleya.'

²⁴Ma ega yaka guguhinina i nae po hinana uyahina i baha i pa, 'Apo awai u luhogala Heloda uyahina a baheya?'

Ega yaka hinana i pa, 'Una nae po una baha una pa, "A luhogaleya ipa Yoni tu wibapatiso unununa una weleu".'

²⁵Ega yaka tewelana i bulili po i gunawileya wasawasa a toumana mitehi uyahihi po i pa, 'A luhogaleya geka hougana Yoni tu wibapatiso unununa hoi gaeba una houni ma una weleu'.

²⁶Geka bahana wasawasa i noonoli po nugonugona i wiyuwa duma, ma tamogi a bahagwala tu witoumanena amaka hi nonoli yaka ega emoemotana ina nugoneya. ²⁷Mala emosi ma numa panipani tu galena itetena i paliweleya i pa, 'Una nae po Yoni gadouna una boli'. Yaka tu galena itete naka pitenana i dewaya po Yoni gadouna i boli, ²⁸po hoi gaeba i houni ma i niyeya po guguhinina i weleya, ma guguhinina i waya po i niyeya hinana uyahina. ²⁹Yoni a hewahewali noyana hi nonoli yaka hi nei po hai popoya hi niyeya po hoi wikokowaga hi houni.

Yesu bolu i wianihi

³⁰Yesu a tu wituwetuwega hi gunawilehi po hai bagibagi po hai wiatatiana atapuna hi wibenabename. ³¹Ma ega hai gaogao ipa hina am babana lawa hai geleta po hai hopu ega hita wohouna. Ega yaka Yesu a hewahewali i paliwelehi i pa, 'Tupo geka ta nehaleya po ta nae hoi balabala po kikina ta wiyagohina'.

³²Ega yaka wam tunawahi hi geluya po hi nae hoi balabala. ³³Ma hi gelugelu bolu hi galehi. Yaka lawa tahayagei hi ibulibulili ma hi nena. Ma hai wibulibulili binei meyagai emosi po emosi lawahi mitehi hi negogona po dobuna uyahina hi geleta tahaya. ³⁴Yesu wam uyahinei i huhopu po bolu baneina i gagalehi po i galena lunugotootogogehi babana galenahi mei sipi ega hai tu galena itete ega yaka i wiwawala po lawa uyahihi i wiatatiyana.

³⁵Ma Yesu a wiatatiyana i lidaoya bolu uyahihi, ma a hewahewali hi galeya naka amaka ibiga i geleta, ega yaka Yesu hi paliweleya hi pa, 'Geka hoi balabala yabayababa ma kabudala e yoliyoli. ³⁶Lawa una himilihi po hina nae hoi tano po hoi meyagai po hai am hina gimala.'

³⁷Yesu i paliwelehi i pa, 'Taumi aniani ona welehi po hina am'.

Ma a hewahewali a baha hi wimiheya hi pa, 'Guyau, ega emoemotiyai. Nugote apo to nae po hai am to gimala, yaka mone baneina to haleya mei kina handele luwaga apo uyahinei ta wianihi.'

³⁸Yesu i baha i pa, 'Palawa wabihaga uyahim? Ona nae lawa uyahihi po palawa ona lupali.'

Yaka a hewahewali hi bibeiha po palawa magouhia numitutu ma iyana luwaga hi tuhagaya.

³⁹Ega yaka Yesu i baha po hiyamoni waiidaidagana uyahina hi duhuna. ⁴⁰Ega yaka hi duhuna bolu po bolu uyahinei mei 50 po 100.

⁴¹Yesu palawa nimitutu ma iyana luwaga i wihini po i galena gae hoi yada ma Yaubada uyahina i wimaamala. Ma palawa i tomutomuya po a hewahewali i welehi po hi gutaya bolu uyahihi. Mei gasi iyana luwaga i tomutomuya po i welehi. ⁴²Ma lawa hi'mam po atapuhi hi'mhiyogo ⁴³po ega yaka a hewahewali palawa ma iyana omtelenana hi tuwaluta meya po hi lauemoteya poha magouhi 12 hi lihogohi. ⁴⁴Yesu ololoto i ianihi magouhi tausana nimitutu.

Yesu boga tepanei i nena

⁴⁵Naka hougana Yesu a hewahewali i paliwelehi i pa, 'Wam ona geluya po ona tahatahaya Besaida ma tau lawa a himilihi po hina nae hai u dobu'. ⁴⁶Ma Yesu bolu i himilihi po hi nena ma tauna i gae u oya ipa ina lupali.

⁴⁷Yesu tunawana oya u tepana ma upom i geleta po a hewahewali boga u tipolina hi woewoe. ⁴⁸Yesu a hewahewali i gagalehi ma hi ileta babana togowa i tupamatamatanihi po ega emoemotahi hina woe yagiyagina po hina damana hoi dobu. Kikina ipa malinatom, ma Yesu i nei po boga tepanei i nena po i nei a hewahewali u liyaliyahi ipa ina weluwilehi.

⁴⁹Yesu hi gagaleya ma boga tepanei i nenei uyahihi ma hi iototu hai nugotuhu hi pa lawa hilahilagena alugona hita tuhagaya. ⁵⁰Babana a hewahewali atapuhi hi gagaleya po hi matouta duma.

Mala emosi ma Yesu i baha nae uyahihi i pa, 'Awai matoutana, ona nugomotu, tau'. ⁵¹Ma Yesu hoi wam i gelu geleta ma togowa i wohouna ma a hewahewali hi gohola dumahi, ⁵²babana bolu Yesu i anihia ega hita nugotuhu tuhagaya matababana nugonugohi matahi hi keke.

Yesu tu tootogo Genesaleta i luyawahihia

⁵³Hi damana po Genesaleta u tuponana hi gota po hai wam hi hepaya. ⁵⁴Ma hi huhopu wam uyahineia po hi gegae ma lawa Yesu hi galeyaa. ⁵⁵Yaka lawa hi wibulibulilia nae meyagai atapuhia uyahihi po tu tootogo ania enogeia hi awalihia po hi nehia maia Yesu uyahina ma apo noyana hina nonolia meka u tuponana e nenaegasia lawa hi wotagoyaa. ⁵⁶Yesu a wiwila tupo atapuna uyahina dobu po meyagai po tano uyahihi, ma lawa hai tu tootogo hi niyehia po hai ania gimala dobuhi uyahihi hi otonaneya po hi laupalia gonugonuwa ipa tu tootogo Yesu a kaleko hina wogo dadania. Ma tauhia hi wodadania yaka hi luyagohana memee.

Yudeya hai dewa

7 ¹Houga gehouna Palisia lawahia po lugagayo tanitaniwagahia Yelusalemgeia hi neia po Yesu u liyaliana hi towotowolo ma hi ihalugeyaa. ²Yesu a hewahewalia hi galena tuhagahia ega nimahia hita oga tahaehia ma apoma hit'omam. Ma hi baha hi pa, 'Yesu a hewahewalia hi gobu'. ³Hai baha babana Palisia lawahia po mi Yudeya atapuhia hai tapalolo dewana naka yeueyua po nimahia he oga imahia apoma apo he'mam. ⁴Ma gasia apo ania gimala uyahineia he neneia naka he togo tahayaa apoma he'mam. Ma lugagayo atapuna googahia uyahihieyia i neneia hi wotagohia gaeba po keyaka po nau hi ogogahia.

⁵Ega yaka Palisia lawahia po lugagayo tanitaniwagahia Yesu hi lubayadeyaa hi pa, 'Awai bineia om hewahewalia googata hai lugagayo ega hita wiyateyatehia, ma a nima gobugobuhia he'mam?'

⁶Yesu hai baha i wimiheya i pa, 'Baha dumana taumi tu wikoyakoyama dumamia, naka bineia ma Yaubada a baha tu bahapiko Isaiyaa i gilumia i pa, "Geka lawahia gamohia yawa e bahabaha wiyateyateu ma nugonugohia hi mebala dao uyahiugeia.

⁷Uyahiu he tapatapololo yababa, babana hai wiatatiana ega tau uyahiugeia ma tauhia hai winugonugotuhugeia."

⁸Omi dewa hi apapoe babana Yaubada a lugagayo o houna gowadihia ma lawa hai lugagayo o wotagohia.

⁹O hanapu duma po omi dewa uyahineia Yaubada a lugagayo o wihinigigiyehia, ma lawa hai lugagayo o iponawogogehia. ¹⁰Geka Yaubada a lugagayo Mose i weleweleya i baha i pa, "Amam ma hinam una wiyateyatehia. Apo lawa awai hinana ma amana ina kawaiapapohia yaka

hina lihilageni.”¹¹ Naka lugagayona o wihinigiyeya ma taumi omi lugagayogei o baheya o pa, apo lawa awai hinana ma amana ina palihalehi po ina pa, “U gapola atapuna amaka a palihaleya Yaubada uyahina po ega emoemotau a hagumi”.¹² Yaka lawana o paliguduguduya po uyahinei amana po hinana apega ina haguhi.¹³ Geka omi wiatatiyana apapoehi googami uyahihiyei o laudamanehi, po Yaubada a baha o laiwayaunihi ma gasi ginouli gehouhi uyahinei Yaubada a lugagayo o tulagonihi.’

Lawa hai apapoe

¹⁴Yesu lawa i otugehi po hi liya mai uyahina ma i paliwelehi, i pa, ‘Ona lutanigana imahi u wiatatiyana uyahina.’¹⁵ Yaniyani emosi po emosi gamomiyei o anani ega emoemotana po ina wiapapoenimi, ma awai gamomiyei e gelegeletai naka tauna e iapapoenimi.¹⁶ [Taumi iyawoi waitanigami yaka ona launonola.]’

¹⁷Ma Yesu bolu i nehalehi po i lui numa u hinena, ma a hewahewali hi lubayadeya hi pa, ‘Emoemotana baha wiluwaluwa geka uta liyayahi uyahiyai?’

¹⁸Ega yaka Yesu i paliwelehi i pa, ‘O winugoneina hota? Ona lutanigana, lawa aniani hi ani po koibahi u hinena i luilui ega ita iapapoenihi’¹⁹ matababana ega ita hopu u nugonugohi, ma i lui u amamohi houga kukuna ma apo ina hopu meme hoi nudanuda.’ (Geka uyahinei Yesu i paliweleta po i pa aniani atapuhi ta ananihi.)

²⁰‘Ma awai gamomiyei e gelegeleta naka tauna e iapapoenimi.²¹ Nugotuhu apapoehi lawa nugonugohiyei e gelegeletai naka: matamaga, danene, omunugo, wihola,²² omboho, nugogobu, koyama, wotutawine, omgenagenalili, wiyalutu, nugogegae, tanigapota,²³ geka dewahi lawa nugonugohi he iapapoenihi.’

Wawine gehouna a witumagana

²⁴Apoma Yesu i nae tupo gehouna Taya meyageina u liyaliyana po i lui numa uyahina, babana ega nugonugona po ipa lawa hina hanapugeya a geleta binei ma tamogi lawa hi tuhagaya.²⁵⁻²⁶ Ma wawine gehouna a geleta noyana i nonoli po i nei. Wawinena ega Yudeyagei ma tauna a dobu Pinisiya tupo Siliya uyahina ma a nei matababana natuna wawinena alugo apapoena i luiya po nugonugona ipa Yesu ina galey a po ina wiyagaya. I nei po Yesu aena u babana i polou po i lupali Yesu uyahina i pa, ‘Alugo apapoena una wiyagaya natuwe uyahina.’

²⁷Yesu wawinena a lupali i wimiheya, i pa, ‘Lawa mi Yudeya a hagu tahaehi apoma tupo gehouhi. Ega emoemotana po logaloga hai yam kedewa a welehi.’

²⁸Wawinena Yesu a paliluwaluwa i wimeheya, i pa, ‘Guyau, naka baha dumana ma kedewa logaloga hai yam hamomouna he lemolemoya.’

²⁹Ega yaka Yesu i baha i pa, ‘Tinani, om baha binei, un'omhoe po una nae om numa uyahina alugo apapoena natum amaka i hopu haleya po i dewadewa’.

³⁰Ma wawinena i wotowolo po i nae a numa uyahina, hougana i geleta anu numa po i lului ma natuna hoi ani eno ma alugo apapoena amaka i hopu haleya.

Yesu gungum lawana i widewadewaya

³¹Yesu Taya i nehaleya po i nae Saidoni po i nehaleya po i nae Dekapoli tuponana uyahina naka Galili bogana tupona. ³²Hougana Yesu i geleta u Galili lawa waigungumna hi neiyai Yesu uyahina po hi lupali hi pa, ‘Yesu, lawa geke una wodadani’.

³³Yesu lawana mitehi bolu hi nehalehi po hi nae uheiya. Ma Yesu nima gigena luwaga lawana u tanigana i houna luyehi po i kokoe. Ma nimana i luhowaya ma lawana menana i wodadani. ³⁴Ma Yesu anai nugowiyuwana i galena watata hoi yada ma i yautu halena ma i paliweleya i pa, ‘Epapata’, ponata, ‘Ona gunahoenimi!’ ³⁵Yaka mala emosi ma lawana tanigana hi gunahoenihi ma menana i teyateya po emoemotana ina baha dumalu.

³⁶Yesu bolu i paliwelehi i pa, ‘Ega tuwegana ona bahebaheya lawa uyahihi’. Ma lawa ega hita geno, Yesu tuwegana hi dedeya lawa atapuhi uyahihi.

³⁷Ma lawa hi nonoli ma hi goholihi, ega yaka hi pa, ‘Yesu a bagibagi hi dewadewa duma. Emoemotana taniga pupu ina baha po hina nonola ma menahi witewiteihi apo ina lidumaluhu po hina baha.’

Yesu bolu gehouna i wianihi

8 ¹Ega houga ita dao ma bolu baneina gehouna hi nei Yesu uyahina ma ega hai am. Ega yaka Yesu a hewahewali i otugehi po i paliwelehi i pa, ²‘Lawa geke a lunugotoogogena dumahi, babana iyeta tonuga mitehi ta memae ma ega hai yam. ³Ma inapa anai omhilagehi a himilihi apo hoi tahaya kamnaha hina apapoe, babana gehouhi bala daodaohiyei hi nei.’

⁴Ma a hewahewali hi pa, ‘Guyau, u hanapugeya tauta geke hoi balabala ta memae ma apo meka aniani ta tuhagaya po lawa ta wianihi?’

⁵Ega yaka Yesu i lubayadehi i pa, ‘Omi palawa wabihaga he memae?’ Hi pa, ‘Palawa magouhi 7 he memae’.

⁶I baha po lawa hoi hipuli hi tugula. Ma palawahi i winihi po Yaubada uyahina i wimaamala. Ma i'mtomutomu po a hewahewali i welehi po hi gutaya lawa uyahihi. ⁷Yesu iyana muhomuhohi ega ita maga ma i winihi po i wimamala Yaubada uyahina ma a hewahewali i welehi po hi guta wiwila lawa uyahihi. ⁸Lawa hi'mam po hi'mhiyougo ma yaniyani

tupotupona hi tutuwaluhi naka poha magouhi 7 hi lihogohi. ⁹Ma ololoto magouhi mei tausana wohepali i himili. ¹⁰Ma Yesu a hewahewali mitehi wam hi geluya po hi damana Damanuta u tuponana.

Palisi lawahi nugonugohi ipa wekiwekilala hina galey

¹¹Palisi lawahi hi nei Yesu uyahina po hi ludadani hi pa, ‘Nugonugoiyai wekiwekilala gehouna una wiatatiyeiyai po to hanapugem tam Yaubada uyahinei u nei’.

¹²Yesu i yautu halena ma i pa, ‘Awai binei geke hapanana manini wekiwekilalana o bibihey? A baha duma uyahimi, apega wekiwekilala gehouna a wogeleteya uyahimi.’ ¹³Ega yaka, i nehalehi po wangei i damana u tupona.

¹⁴A hewahewali hai palawa ega hita waya babana nugohi i guluwi ma hai palawa emosi hota hoi wam. ¹⁵Yesu i baha i pa, ‘Ona galena imahi Palisi po Heloda lawahi hai palawa ani lihaahanana naka nugohine gowagowada’.

¹⁶Yesu a hewahewali tunawahi ma hi ibaabani hi pa, ‘Geka a nugotuhuna binei ma ata palawa nugota i guluwi po ega tata waya’.

¹⁷Yesu hai wibaabani i hanapugeya yaka i baha uyahihi i pa, ‘Awai binei o ibaabani palawa, bo? Ega palawa binei ata bahabaha, ma nugote nugonugomi hi kapala yaka u baha anohi ega ota nugotuhu tuhagahi.

¹⁸“Waimatami ma ega ota ihalu,
waitanigami ma ega ota launonola.”

¹⁹Nugomi i guluwi? Hougana tausana nimitutu a ianihi palawa nimitutu uyahinei ma o laugogona meya poha wabihaga?’

Hi pa, ‘Poha magouhi 12’.

²⁰Ma i baha meme i pa, ‘Hougana tausana wohepali a ianihi palawa magouhi 7 uyahihiyei, naka o tutuwaluhi poha wabihaga o lihogohi?’
A hewahewali hi pa, ‘Poha magouhi 7’.

²¹Ega yaka i baha i pa, ‘Iyowai nugonugomi yohola ega hita lugiigilihi?’

Matakeke lawana Yesu i luyawahi u Besaida

²²Yesu a hewahewali mitehi hi damana po hi gota Besaida u meyageina, ma lawa matana keekena hi neiyai Yesu uyahina po hi lupali hi pa, ina wodadani. ²³Ega yaka Yesu matakeke lawana u nimana i wogo ma meyagai hi nehaleya po hi nae uheiya, ma Yesu lawana matana luwaga i howahi ma nimana i hounihi u matana po i wihalehi ma i baha i pa, ‘Ginouli awai e gagalehi?’

²⁴Ma tu matakeke i pa, ‘Lawa a gagalehi ma amaka mei mayau hina nena’.

²⁵Ega yaka Yesu nimana i houna mehi u matana po nimana i wihalehi ma lawana i lumatabohoboho ma matana hi lugigilihi po ginouli atapuhi

i galena imahiyehi. ²⁶Ega yaka Yesu i paliweleya i pa, 'Ega una nena'e bolu uyahihi, ma una dumalu po una nae om numa uyahina'.

Pita i baha dumalu Yesu binei

²⁷Yesu a hewahewali mitehi tupo Sisaliya Pilipai tahayanei hi nena'e ma i lubayadehi i pa, 'Lawa hai winugonugotuhu hi pa tau iyai?'

²⁸A hewahewali hi pa, 'Lawa hi pa tam Yoni bapatiso, ma gehouhi hi pa tam Elaisiya lawa odubona, ma gehouhi hi pa tam tu bahapiko odubona gehouna'.

²⁹Apoma a hewahewali uyahihi i baha nae i pa, 'Ma taumi, omi nugotuhu o pa tau iyai?'

Ma Pita a baha i wimiheya i pa, 'Tam, Yaubada a Besinana lawana'.

³⁰Yesu i paliwelehi i pa, 'Ega iyai gehouna ona palipaliweleya'.

Yesu a hilage bahana i baha

³¹Yesu tauna i bahena meya i pa, 'Apo Lawa Moinau wiyuwa galenahi magomagouhi a wialonihi. Apo mi Yudeya hai tanitaniwaga po tu witalaguyaba babadahi po lugagayo tanitaniwagahi hina wihinigigiyeu. Ma apo hina uniu po iyeta tonuga u mulina a towolo meme.'

³²Yesu a baha dumalu binei Pita i weluwaya po hi tunae uheiya ma i'mpaligudugudu uyahina ³³Yesu i luhagawileya po a hewahewali i galehi ma Pita i paliyeya i pa, 'Tomodulele, una nehaleu om winugonugotuhu mei lawa hota hai winugonugotuhu, ma ega mei Yaubada a nugotuhu'.

³⁴Yesu bolu po a hewahewali i paliwelehi i pa, 'Inapa lawa awai nugonugona ina wotagou yaka a luyagohana ina palihaleya. Ma anani take ina awali ma ina wotagou. ³⁵Apo iyawoi ega biugei hina hilage yaka apo yautuhi hina halehi. Ma iyawoi tau biugei ma tuwega dewadewana binei hina hilage apega yautuhi hina halehi. ³⁶Inapa iyai ina wigapola duma yaka Yaubada a dewa apo ina winugoguluwi, naka apo awai dewadewana ina tuhagaya? ³⁷Ma lawa a luyagohana naka ginouli baneina. ³⁸Apo lawa awai tau ma u baha ubeihi ina ihinimaya geke hapana u matahi babana tu apapoe apo hina paliguyoguyougeya yaka tau Lawa Moinau u houga nei uyahina apo tauna a wihinimaeya. Naka hougana uyahina tau ma Amau po a tu winoyanoya waiwoyawahi hai wasawasa namanamalinei a nei.'

Yesu galenana i buiya

9 ¹Yesu bolu i paliwelehi i pa, 'A baha duma uyahimi, gehoumi geke hosi o towotowolo apega ona hilage a sigana Yaubada a taniwaga waipoyana ina geleta po ona galeyau'.

²Iyeta magouhi 6 hi kokoe ma Pita ma Yamesa ma Yoni tunawahi Yesu i weluwinihi po hi gae oya baneina u tepana. Hai mae uyahina ma Yesu

galenana i buiua u matahi, ³po a luiui galenana i wakeke lagona duma po i namanamali ega mei iyai hoi hipuli kaleko ina deoya po wakekena. ⁴Ma babada odubohi hi lugeletehi po Yesu mitehi hi ibaabani. Babadahi naka Mose ma Elaisiya.

⁵Ma Pita i baha Yesu uyahina i pa, 'Guyau, i haki duma po tauyai geke hosi. Apo kape tonuga to wogohi, emosi tam bingei ma emosi Mose binei ma emosi Elaisiya binei.' ⁶Pita a matouta binei ma i baha yababa.

⁷Ma gahu i lutatahi ma gahuna u hinena pona hi noonoli i pa, 'Natuwe geke, a luhogaleya; tauna ona wiponawogogeya'.

⁸Mala emosi ma a hewahewali hi haghagawila po ega lawa gehouna hita galeya ma Yesu tunawana i towotowolo.

⁹Oyagei hi hopuhopu mai ma Yesu a hewahewali i paliwelehi i pa, 'Ega lawa uyahihi ona bahebaheu, awai o gagalehi, a sigana tau Lawa Moinau hilage uyahinei apo a towolo meme. ¹⁰Yesu a baha hi wiponawogogeya po ega hita wiyahoneya ma tamogi hi nugonugotuhu hi pa, 'Hilage uyahinei towolo memena anona awai?'

¹¹Ma Yesu uyahina hi lubayada hi pa, 'Awai binei lugagayo tanitaniwagahi hi baheya hi pa, apo Elaisiya ina tahaya mai ma u mulina apo Besinana lawana ina nei?'

¹²Yesu i baha nae uyahihi i pa, 'Naka moina dumana, Elaisiya ipa ina tahaya mai po ginouli atapuhi ina lidumaluhi. Ma awai binei ma Yaubada a Buka uyahina hi gilugilumi hi pa, Lawa Moinau apo wiyuwa a tuhagahi po paliguyaguyau. ¹³Ma tamogi Elaisiyana amaka i nei, ma hi wihinigiyeya, mei Yaubada a Buka uyahina hi bahebaheya.'

Alugo apapoena tewela uyahina Yesu i wiyagaya

¹⁴Yesu a hewahewali tonuga mitehi oyagei hi hopu mai po a hewahewali gehouhi hi tuhagahi ma lugagaya tanitaniwagahi mitehi he laugamobagibagi ma bolu baneina hi'mboina. ¹⁵Hougana bolu Yesu hi galeya ma hi goholihi ega yaka hi bulili po hi witutuhaga ma hi mamali.

¹⁶Ma i lubayadehi i pa, 'Awai binei o laugamobagibagi?'

¹⁷Bolu u hayahi lawa gehouna Yesu i paliweleya i pa, 'Bada, natuwe alugo apapoena i luiya ma a neneiyai uyahim po tam ega geke hota. Natuwe geke ega emoemotana po ina baha ¹⁸ma houga gehouhi alugo apapoena e luiya ma e guli hoi hipuli po pulopulo gamonei he gelegeleta ma niwona e yamhanakidiyana ma e yamtatamomota. Ma om hewahewali uyahihi a baha ipa alugo apapoena hina wiyagaya ma ega emoemotahi.'

¹⁹Yesu i baha i pa, 'Taumi hapa geke ega omi witumagana. Houga a dao awai apo a meme liyanimi po a genogenogemi? Tewelana ona neiyai uyahiu.'

²⁰Apoma tewelana hi neiyai Yesu uyahina ma alugona Yesu i galeya ma i wimatauguuguwa po i peu hoi hipuli po i taatawa ma gamonei pulopulo hi gelegeleta.

²¹Yesu tewelana a totogo i galeyama ma i lubayada amana uyahina i pa, 'Iyowai a totogo a dao?'

Tewela amana Yesu a baha i wimiheya i pa, ²²'A habuluna ma i nei po geka hougana, ma alugo apapoena e ileta ipa ina lilihilageni ma e haleya mayau ebebalana uyahina po gasi goila u hinena. Yaka emoemotam una lunugotootogogeiyai po una haguuiyai.'

²³Yesu a baha i wimiheya i pa, 'Awai binei u baha u pa, "Emoemotam"? Ginouli atapuhi witumaganagei emoemotahi.'

²⁴Mala emosi tewela amana i baha gonugonuwa i pa, 'A witumaganem, ma u witumagana ega ita lata yaka una haguwe'.

²⁵Yesu bolu i gagalehi ma hi bulibulili mai u liyaliyana yaka alugo apapoena i paliyeya i pa, 'Alugo gumgum geka hougana una hopu haleya ega una lului meya!'

²⁶Ega yaka alugo i otu labatana ma tewelana i wimatauguuguwa po i guli hoi hipuli, ma alugo apapoena i hopu haleya, ma bolu tewelana hi galeyama ma hi pa, 'Amaka i hilage!' ²⁷Ma ega yaka Yesu tewela u nimana i wogo po i wotowoli po mitehi hi towotowolo.

²⁸Yesu a hewahewali mitehi lawa hi nehalehi po hi nae numa u hinena po tunawahi ma hi lubayadeya hi pa, 'Iyowai po ega emoemotiyai alugo apapoena to wiyagaya?'

²⁹Ega yaka Yesu hai baha i wimiheya i pa, 'Lupaligei emoemotana alugo apapoehi lawa u hinehi hina lupa hopu, ma ega awai gehouna'.

Yesu a hilage bahana i wiluwagaya

³⁰Dobu naka hi nehaleya po hi damana Galili u tupona. Yesu ega nugonugona ipa lawa hai ani nae hina hanapugeya, ³¹babana ipa a hewahewali ina wiatatiyehi. Ma i baha nae uyahihi i pa, 'Lawa Moinau apo hina houna damaneu lawa u nimahi po hina lilihilageniu ma apo iyeta witonugana uyahina hilagei apo a towolo meme'. ³²A baha uyahihi ega hita nugotuhu tuhagaya ma hi nugolowo yaka ega hita lubayada meme uyahina.

Tu tahaya tauhi tu wimuli

³³Hi geleta Kapaneum po hi lui hoi numa po Yesu a hewahewali i lubayadehi i pa, 'Awai hoi tahaya o yampaliwilewileya?' ³⁴Atapuhi hi genuwana, matababana hoi tahaya tunawahi ma hi wigamogahigahi wibadabada binei po hi wihinimaya.

³⁵Yesu i tugula ma magouhi 12 i otugehi, po i baha uyahihi i pa, 'Apo iyai nugonugona po ina tahaya, tauna ina nugohopuhopu ma ina witubagibagi a lawa ubeihi'.

³⁶Ega yaka tewela gehouna i waya po u naohi i wotowoli ma i talahagauya ma i baha uyahihi ipa, ³⁷'Iyai gowauegi geka tewelana

ina likaohaya yaka tau i likaohau. Ma iyai ina likaohau yaka ega tau tunawau ma tu himiliu i likaohaya.’

³⁸Yoni i baha Yesu uyahina i pa, ‘Bada, lawa gehouna gowamgei ma alugo apapoehi i iyagahi ma to baha po ipa ina wohouna, matababana tauna ega ata bolu u hinena.’

³⁹Yesu i baha i pa, ‘Ega ona yamgudugudu apo iyai manini ina dewadewahi gowaugei naka tauna ega ita palipalidibogiu, ⁴⁰babana iyai ega ita igawiyeta naka tulata. ⁴¹A baha duma uyahimi, apo iyai goila ina welemi babana taumi Keliso a bolu, yaka a meiha apo ina tuhagaya.

⁴²‘Apo tu witumaganeu lawana a winugonugotuhu mei geke tewelana, ma lawa awai ina lipeuya, yaka a dumalu itapa gaima baneina u gadouna hita duli ma u boga dum dum hita halena hopuneya. Ma ega ita dumalu ipa geke tu tapitapiyana ina dewaya po apapoe ina dewadewaya. ⁴³⁻⁴⁴Apo nimam ina laipeunim yaka una boli haleya. Naka ega apapoe awai babana nimam emosi yaka luyagohana apo una tuhagaya. Tamogi woapapoe dumana naka nimam luwaga a dewadewahi ma apo hina halena hopunem mayau ebebalana ega sigasigana uyahina. ⁴⁵⁻⁴⁶Ma apo aem ina laipeunim yaka una boli haleya. Naka ega apapoe awai, babana apo aem emosi yaka luyagohana una tuhagaya. Tamogi woapapoe dumana naka aem luwaga a dewadewahi ma apo hina halena hopunem mayau ebebalana uyahina.

⁴⁷Apo gasi matam ina laipeunim yaka una wahi haleya. Naka ega apapoe awai babana matam emosi yaka Yaubada anani taniwaga una luiya.

Tamogi woapapoe dumana naka matam luwaga a dewadewahi ma apo hina halena hopunem mayau ebebalana uyahina. ⁴⁸Tupo noka uyahina,

“Motamota hai ani mae

ma mayau ebalana ega ita bohoboho.”

⁴⁹‘Gasi atapumi mayau ebebalana apo ina widewadewami, mei niha aniani e idewadewaya.

⁵⁰‘Niha ginouli dewadewana ma dagihana ina kokoe ega emoemotana po ina dagiha meme. Niha naka omi dewa. Dewa dewadewana ona wibagigabi po omi lawa mitehi ona nugoemota.’

Yesu a wiatatiyana wihulu binei

10 ¹Yesu a hewahewali mitehi Galili hi nehaleya po hi nae Yudeya u tupona po Yodani goilana hi damani po lawa hi galeyaya yaka bolu hi'mboina nae ma a dewa tauna bolu uyahihi i iatatiyana.

²Ma Palisi lawahi hi nei Yesu uyahina ipa hina ludadani hi pa, ‘Iyowai apo lawa agona ina nehaya naka apapoe?’

³Yesu i lubayadehi i pa, ‘Iyowai Mose a lugagayo uyahimi?’

⁴Palisi lawahi hi pa, ‘Mose lugagayo i pa, apo lawa agona ina hahaleya yaka giluma gehouna ina gilumi po wawinena ina weleya ma apoma ina wihulu’.

⁵Ega yaka Yesu i paliwelehi i pa, ‘Mose lugagayona i welewelemi matababana omi nugokapala tepanei. ⁶Houga a wawala uyahina Yaubada lawa luwaga i wiwawalihi oloto ma wawine. ⁷Oloto amana ma hinana ina nehalehi po agona ina waya po mitehi hina megogona. ⁸Yaka hai luwaga hina wihiniemosi ma ega hini luwaga. ⁹Oloto ma wawine hai tawine Yaubada i popo emotehi, ega lawa hina lupelupena halehi.’

¹⁰Yesu bolu uyahihi a wiatatiyana i luwegahi ma hi gunawilehi hai numa uyahina, ma a hewahewali Yesu hi lubayadeya a baha wihulu binei. ¹¹Ega yaka Yesu i paliwelehi i pa, ‘Oloto awai agona ina haleya ma wawine gehouna ina lawagi naka e matamatamaga. ¹²Ma wawine awai agona ina haleya ma oloto gehouna ina lawagi naka e matamatamaga.’

Yesu logaloga i kawaidewedewehi

¹³Ma lawa gehouhi logaloga hi nehi mai Yesu uyahina ipa ina wotepanihi ma a hewahewali hi paliyehi. ¹⁴Ma Yesu i gagalehi po nugonugona i apapoe hai baha binei yaka i baha i pa, ‘Logaloga ona palihalehi po hina nenei uyahiu ma ega ona guduguduhi. Matababana lawa mei geka logalogahi apo Yaubada anani taniwaga hina luiya. ¹⁵A baha duma uyahimi, apo iyai Yaubada anani taniwaga ina luiya ipa nugonugona ina dewaya po mei logaloga hai winugonugotuhu.’ ¹⁶Yesu logaloga i gunihi po u nimana ma i kawaidewedewehi.

Tu wigapola

¹⁷Yesu i wotowolo po tahayagei i nena ma tu wigapola lawana i bulili mai po i tutunei i'mtutonetonena u matana ma i lubayada i pa, ‘Bada dewadewam, apo awai a dewaya po luyagohana tuwetuwenai Yaubada ina weleu?’

¹⁸Ma Yesu i paliweleya i pa, ‘Om winugonugotuhu awai binei u kawaidewadewageu? Ega iyai ita dewadewa ma Yaubada tunawana. ¹⁹Lugagayo u hanapugehi hi pa, “Ega una yamunugo, ega una matamatamaga, ega una danedanene, ega una igou koyakoyama, ega koyamagei una laugapola, amam ma hinam una wiyateyatehi”.’

²⁰Ma lawana i baha i pa, ‘Bada, geka lugagayohi a habuluwe a wootagohi ma i nei po amalai.’

²¹Yesu lawana i galena lunugotoogogeya ma i pa, ‘Ginouli emosi hota ega uyahim. Om gapola magomagouhi una gimalena halehi po monehi tu dayadayabu una welehi, ma una nei po una wotagou. Yaka apo hoi yada una wigapola.’

²²Hewalina Yesu a baha i noonoli po anai nugodubuna i gulawilena meya, babana a gapola hi maga duma.

²³Yesu i luhagawileya po a hewahewali uyahihi i pa, ‘Tu wigapola lawahi hai lui Yaubada anani taniwaga uyahina i witai.’

²⁴A baha geka uyahina ma a hewahewali hi goholihi yaka Yesu i pa, 'U logaloga Yaubada anani taniwaga luina i witai duma. ²⁵Kamela ega emoemotana heyau domona ina honogi. Ma tu wigapola lawana a lui Yaubada anani taniwaga uyahina i wipilipili lagona apoma noka kamela a honoga.'

²⁶Yesu a baha uyahina ma a hewahewali hi nugogohola duma po hi lubayada hi pa, 'Heki, iyai apo luyagohana ina tuhagaya?'

²⁷Yesu i galehi po i kokoe ma i baha uyahihi i pa, 'Lawa uyahihi luyagohana tuhagana ega emoemotahi ma Yaubada uyahina ginouli atapuhi emoemotana'.

²⁸Ega yaka Pita i baha nae i pa, 'Una galeya i gapola atapuhi to nehalehi po to wootagom'.

²⁹Ma Yesu i baha uyahihi i pa, 'A baha duma uyahimi, apo iyai a meyagai bo walewalehina bo nounouna bo hinana po amana bo natunatuna bo a tano tau biugei po gasi tuwega dewadewana binei ina nehalehi, ³⁰tauna geka hougana ginouli magomagouhi ina tuhagahi Yaubada uyahinei, a numa ma walewalehina ma nounouna ma hinahinana ma natunatuna ma a tano apo ina tuhagahi ma lawa apo hina widibogi ma tamogi houga he nenei luyagohana ega sigana apo ina tuhagaya. ³¹Ma amalai gehouhi he tahatahaya apo hina wimuli. Ma amalai gehouhi he imuli apo hina tahaya.'

Yesu a hilage bahana i witonugaya

³²Noka hougana hi nena u Yelusalem po Yesu i tahaya ma a hewahewali hi nugohole ma tu wotagona gehouhi hi matouta duma hi gegae Yelusalem binei. Hoi tahaya ma a hewahewali i paliwelehi apo awai hina gelegeleta uyahina binei i pa, ³³'Tauta ta nena u Yelusalem apo Lawa Moinau hina palihaleu, tu witalaguyaba babadahi ma lugagayo tanitaniwagahi u nimahi apo u hilage binei hina taniwaga. Ma hina palihaleu tu meuputa hai tu wigawiya u nimahi po ³⁴apo hina paliguyoguyougeu ma hina howahowau po hina kodikodiliu po ina kokoe ma apo hina lihilageniu. Ma iyeta tonuga hina kokoe apo a towolo meme.'

Yamesa ma Yoni hai lupali Yesu uyahina

³⁵Yamesa ma Yoni, Sebedi natunatuna, hi nei Yesu uyahina po hi baha hi pa, 'Bada, to nei uyahim po to lubayadem'.

³⁶Yesu i pa, 'Awai nugonugomi?'

³⁷Hi baha uyahina hi pa, 'Apo om wasawasa una tutuhagaya hougana, ma emoemotana apo tata tugula gogona gehouna u awala hinebawam ma gehouna u keham'.

³⁸Ega yaka Yesu i baha nae uyahihi i pa, 'Omi lupali anona ega ota hanapugeya. Emoemotami apo wiyuwa ani umana a umumaya taumi

gasi on'umaya? Emoemotami apo hilage bapatisona a wiwaya taumi ona waya?'

³⁹Ma hi pa, 'Emoemotiyai'.

Ega yaka Yesu i paliwelehi i pa, 'Naka moina, apo wiyuwana a umumaya taumi on'umaya po hilage a tutuhagaya apo taumi ona tuhagaya. ⁴⁰Ma tamogi ega emoemotau po a taniwaga po ona tugula u awala hinebawau bo u awala kehau. Yaubada tauna e woononogo iyawoi apo hina tugula.'

⁴¹Ma a hewahewali magouhi 10, Yamesa ma Yoni hai lubayada hi noonoli po hi luuyogigai. ⁴²Yesu i boinihi po i baha nae uyahihi i pa, 'O hanapugeya tanitaniwaga hipuligei lawa uyahihi hi taniwaga kadidili duma, po tauhi mei tu wasawasa. ⁴³Ma taumi ega ipa naka pitenana ona dewadewayaya. Apo u hayami tam iyai ipa una witaniwaga, yaka una witubagibagi om lawa ubeihi. ⁴⁴Apo gasi iyai u hayami ipa ina tahaemi, yaka tauna a lawa ubeihi ina witupupoula. ⁴⁵Mei gasi tau Lawa Moinau a nenei hoi hipuli ega ipa lawa biugei hina bagibagi, ma tau ipa a witubagibagi lawa ubeihi, po yautuwe a palihaleya lawa magomagouhi ubeihi ipa a lupenihi.'

Batimeyo matana i lugiigili

⁴⁶Yesu a hewahewali mitehi hi geleta Yeliko po ipa hina nehaleya ma lawa matana keekena gowana Batimeyo babana Timeyo natuna tahaya u liyaliyana i tugutugula, ma gapola i lulupali. ⁴⁷Ma tuwega i nonoli ipa Yesu lawa Nasaletagei, yaka i otu i pa, 'Yesu, Dawita gogana, hilaki uta lunugotootogogeu!'

⁴⁸Ma lawa magomagouhi hi paliyeya hi pa, 'Hei, una genuwana!'

Tamogi i otu labatana i pa, 'Tam Dawita gogana, una lunugotootogogeu!'

⁴⁹Yesu i tutowolo ma i baha i pa, 'On'otugeya'.

Ega yaka tu matakeke hi otugeya hi pa, 'Una kaoha! Una towolo, Yesu e ototugem.' ⁵⁰Mala emosi ma a lupulu i halehi ma i wotowolo po i nae Yesu uyahina.

⁵¹Yesu i lubayadeya i pa, 'Om luhogala awai uyahim a dewaya?'

Tu matakeke i pa, 'Guyau, u luhogala ipa matau hina dewadewa'.

⁵²Ma Yesu uyahina i baha i pa, 'Una nae. Om witumagana i luyawahim.' Mala emosi ma matana i galeneya ma Yesu hoi tahaya i wotagoya po hi nae.

Yesu a lui Yelusalema

11 ¹Hi nae Yelusalema u liyaliyana po hi geleta u Betepage po u Betani naka oya Oliweta uyahina. Yesu a hewahewali luwaga i himila tahaehi i pa, ²'Meyagai u naomi ona nae po ona luiluiya naka hota

doniki wouna yohola ega hita geluya ma e memae, apo ona tuhagaya. Ona lupeni po ona neiyai geke hosi. ³Ma inapa iyai ina lubayademi ina pa, “Awai binei o lupelupeni?” yaka ona pa, “Guyau ipa ina wibagibagi ma apo ina gunawileya”.

⁴Hai luwaga hi nae po hi geleta meyagai uyahina. Ma hi galeya doniki anai lutamina i memae numa u matetana. Ega yaka doniki lutamina hi lupelupeni. ⁵Ma lawa hi pa, ‘Hei, awai binei doniki naka o lupelupeni?’

⁶Ega yaka hi pa, ‘Guyau i pa houga kuku hotana ina wibagibagi ma apo ina himila meya’, po ega yaka hi palihaleya. ⁷Apoma donikina hi niyeya Yesu uyahina, po hai kalekoge donikina upuna hi lutouli ma Yesu i gelu. ⁸Ma lawa magomagouhi hai kalekoge tahayana hi lutouli ma lawa gehouhi mayau luguluguhi hi bolihi po a tahaya hi lutouli. ⁹Ma lawa u naonei po mulinei hi nene ma hi ototu po hi wotalagae hi pa,

‘To wotalagiyem!’

‘Guyau gowanei e nenei Yaubada ina kawaidewedewem!’

¹⁰ ‘Gogata Dawita anani taniwagagei e nenei Yaubada ina kawaidewedewem!’

‘Ani’mhuna duma tam Gegewahagam uyahim!’

¹¹Hougana Yesu i geleta Yelusalem po i lui numa dalabu baneina uyahina po ginouli atapuhi i galehi numa dalabu u hinena. Ma amaka aibiga yaka a hewahewali magouhi 12 mitehi hi gunawilehi u Betani po noka hotanana hi eno.

Yesu mayau i paligubaya

¹²Malatomtomgei Yesu a hewahewali mitehi Betanigei hi gunagunawilehi, po hoi tahaya Yesu am i hilage. ¹³Ma i gagalena nae po mayau mei mabewa i galeya yaka i nae u liyaliana ipa apo ugonana ina tami. Ma mayouna ega ugonana ma lugu yawa babana ega hai houga ugo. ¹⁴Ega yaka Yesu mayau i paliyeya i pa, ‘Apega ugomgei lawa hina am a sigana’. Ma a hewahewali hi nonoli mayau uyahina i bahabaha nae.

Yesu tu gimala i wiyagahi numa dalabu u hinena

¹⁵Hougana hi geleta Yelusalem po Yesu numa dalabu baneina i luiya ma i wiwawala po tu gimagimale i wiyagahi ma gasi mone tu wiyawepeli hai pata i lugoluhi ma bunebune tu gimalahalenahi hai ani tugula i lubuiya. ¹⁶Ma i taniwaga po ipa ega iyai hai gapola numa dalabu u hinena ina awawala. ¹⁷Ega yaka Yesu lawa i guguyahi i pa, ‘Yaubada a Buka gilugiluma uyahina i baheya i pa,

“U numa tupo wohepali hai ani lupali binei.”

Ma taumi o buiya po tu danedanene hai ani megowada.’

¹⁸Ma tu witalaguyaba babadahi po lugagayo tanitaniwagahi a baha hi nonoli po hi luuyogigai ma hi pa, mata awai uyahinei ma apo hina

lihilageni. Ma lawa atapuhi Yesu a guguya nugohi i waya po tanitaniwaga lawa hi matutehi po ega Yesu hita womomohi. ¹⁹Ma amaka aibiga yaka Yesu a hewahewali mitehi Yelusalem hi nehaleya po hi nae Betani u tuponana.

Yesu mayau i palipaligubaya i kokodila

²⁰Yesu a hewahewali mitehi malatomtom kikina hi wotowolo po hi nena Yelusalem po hoi tahaya ma Yesu mayau i palipaligubaya hi gagaleya atapuna amaka i kokodila. ²¹Ega yaka Pita Yesu a wogalahi i nugotuhuya yaka i baha i pa, ‘Guyau, mayau una galeya u palipaliyeya po amaka i kokodila.’

²²Yesu a hewahewali hai wibaabani i nonoli yaka i baha uyahihi i pa, ‘A baha duma uyahimi, ²³apo iyai oya geke uyahina ina baha po ina gunawotowi po u boga ina yoli, apega anai nugoluwaluwagana ma inapa anai witumaganana yaka apo ina wiponawogogeya. ²⁴A baha uyahimi, anai witumaganami ona laupali po omi luhogala awai Yaubada uyahina ona paligeletehi yaka apo ona tuhagaya. ²⁵Ma omi lupali hougahi uyahihi lawa hai apapoe uyahimi ona nugotuhuya yaka ona paligigilihi. Uyahinei Amami hoi yada apo omi apapoe ina paligigilihi. [²⁶Inapa lawa hai apapoe uyahimi ega ona paligigilihi yaka Amami hoi yada omi apapoe apega ina paligigilihi.]’

Yesu a bagibagi taniwagana

²⁷Yesu a hewahewali mitehi hi geleta Yelusalem po i lui numa dalabu u hinena i lautowolo nae ma mi Yudeya hai tanitaniwaga po tu witalaguyaba babadahi po lugagayo tanitaniwagahi hi nei uyahina, po Yesu hi lubayadeya hi pa, ²⁸‘Witaniwaga awai u waya po geke ginoulihi e dewadewahi, bo iyai geke witaniwagana i welem?’

²⁹Yesu hai baha i wimiheya i pa, ‘Hapali tau gasi u lubayada a welemi, po ona wimiheya yaka apo omi lubayada a wimiheya, po iyai geke witaniwagana i weleu. ³⁰Yoni a witaniwaga yadei i nei bo lawa uyahihiyei i nei po i ibapatiso? Ona paliweleu.’

³¹Ma tunawahi u hayahi hi ibaabani hi pa, ‘Apo awai ta baheya? Apo tana pa, “Yadei”, apo ina pa, “Awai binei ega ota witumaganeya?” ³²Ma apo tana pa, “Lawa uyahihiyei”, yaka apo bolu hina luyogigai uyahita.’ (Babana lawa hai winugonugotuhu naka Yoni tu bahapiko gehouna.)

³³Ega yaka a baha hi wimiheya hi pa, ‘Ega tota hanapugeya miyei i nei’. Ma Yesu uyahihi i baha i pa, ‘Tau gasi apega a paliwelemi witaniwaga awai a waya po geke ginoulihi a dewadewahi.’

Bada a tano tu bagibagiyena

12 ¹Apoma Yesu i wiwawala po paliluwaluwahi lawa i paliwelehi i pa, ‘Lawa gehouna gologolowa ugonu uyahina wine he

dewadewayaya i lupehiyeya. Ma gali i dewaya po i wiwila, ma wine pihagana i dewaya, ma tanona u hinena ani luwiyau numana i wogoya, ma tu galena itete hai ututu i lawi ma i nehalehi po i nae bala daodaona. ²Omllohina hougana uyahina badana a hewali i himili po i nae tano tu galena itete uyahihi ipa ugonu tupona hina weleya. ³Tamogi tano tu galena itete badana a hewali hi wilawi ma a nima kwakwawina hi himili po i gunawileya. ⁴Ega yaka badana a hewali wiluwagana i himili po i nae uyahihi po unununa hi hedali po anai wihinimayana i gunawileya. ⁵Ma gehouna i himili po hi lihilageni ma atapuhi naka dewana uyahinei hi dewahi gehouhi hi wilawihi ma gehouhi hi lihilagenihi.

⁶‘A hewahewali atapuhi i himilihi po hi kokoe. Ma tauna natu hotana i lauhogaleya tunawana i tupu. Ega yaka i himili tano tu galena itete uyahihi i pa, “Geka natuwe yaka apo hina wiyateyateya”.

⁷‘Tamogi hougana tano tu galena itete natunana hi galeyaya yaka tunawahi hi ibaabani hi pa, “Tanona muliyeyi tu witaniwagana geegeka. Tan’uni po geka tanona ipa ina nena uyahina naka apo ina wigalitiyeyi.” ⁸Ega yaka hi womomohi, po hi lihilageni po hi halena hopuneya tanona uputana.’

⁹Yesu i lubayada i pa, ‘Tanona taniwagana apo tano tu galena itete iyowai ina dewahi? Apo ina nei po ina unuhi ma tano tu galena itete gehouhi u nimahi tanona ina houni. ¹⁰Nugote Yaubada a Buka hi gilugilumi, yohola ega ota nugotuhu tuhagaya i pa,

“Ogolana tauna tu lunuma hi ihinigigiyeya
amalai i gunabuiya po i dewadewa lagona.

¹¹Naka Guyau a bagibagi uyahita ani nugogohola u matata.”

¹²Yesu a paliluwaluwa hi noonoli po uyahinei tanitaniwaga hi pa tauhi ubeihi ita'mpaliluwaluwa ma ipa hina numa panipani ma tamogi bolu hi matutehi. Ega yaka hi nehaleya po hi nae.

Sisa mi Loma hai wasawasa a takisi

¹³Ega yaka Palisi lawahi po Heloda hai bolu hi nei Yesu uyahina po ipa hina lubayadeya po a baha powa hina tuhagaya. ¹⁴Ma hi liya nae Yesu uyahina po hi pa, ‘Bada, to hanapugem tam lawa dumadumalum ma lawa kadikadidilihi ega uta genogenogehi. Ma Yaubada a tahaya dumadumaluna e bahebaheya lawa atapuhi u matahi. Ma iyowai, mi Loma hai taniwaga ta wotagoya po takisi ta huhouni, bo ega? ¹⁵Sisa ta weleweleya bo ega?’

Ma Yesu amaka hai lubayada koyakoyama i hanapuya yaka i pa, ‘Awai binei o laudadaniu? Ipa lubayada geka uyahinei ma ona paniu. Ma heki, naka monena ona weleu po a galeyaya.’ ¹⁶Ega yaka mone hi weleya po i lubayadehi i pa, ‘Iyai tepana galenana po gowana geka monena uyahina?’ Hi baha uyahina hi pa, ‘Sisa galenana’.

¹⁷Ega yaka Yesu uyahihi i baha i pa, ‘Heki, ginouli awai Sisa galinei Sisa ona weleya. Ma ginouli awai Yaubada galinei Yaubada ona weleya.’
Yesu a baha hi nonoli po hi nugogohola duma.

Hilage towolo memena

¹⁸Sadusi hai bolu lawahi hilage towolo memena ega hita itumaganeya. Tauhi hi nei Yesu uyahina, ¹⁹po hi lubayadeya hi pa, ‘Bada, Mose geka lugagayona ubeiyai i gilumi i pa, “Oloto awai ina tawine po ega ina winatuna ma ina hilage, apo walehina hiwapena ina lawagi po hina winatuna yaka naka popoyana galinei”. ²⁰Lawa gehouna natunatuna ololotohi magouhi 7. Tutuwoga i tawine po ega natuna ma i hilage. ²¹Ma ega yaka tu hulatuna hiwapena i lawagi po ega gasi natuna ma i hilage. Ma witonugahi hai hiwapena i lawagi po gasi ega natuna ma i hilage. ²²Atapuhina magouhi 7 ega hita winatuna. Ma wawinena tunawana i memae po i hilage. ²³Uyahinei ma hoi towolo meme wawinena apo agona iyai? Matababana magouhi 7 i lawaga pahihi.’

²⁴Ega yaka Yesu i baha nae uyahihi i pa, ‘Taumi naka o koyakoyamena memi babana Yaubada a Buka gilugilumana ega ota hanapugeya, ma gasi a wipoya ega ota hanapugeya. ²⁵Ma houga towolo meme uyahina apo tauhi tu hilage hina towolo apega hina tawitawine po apega hina itawinehi, tamogi hai mae yada uyahina tauhi ani galenahi mei tu winoyanoya mi yadena. ²⁶Ega Mose a buka ota hiyawa tuhagaya. Mayau towotowolona i alalahi hougana Mose i limoineya naka lawa hoi hilage he towotowolo meme. Noka hougana Yaubada i baha nae uyahina i pa, “Abelham a Yaubada tau, po Isako a Yaubada tau, po Yakobo a Yaubada tau”. ²⁷Tauna ega lawa hilahilagehi hai Yaubada ma lawa lauyagohanahi hai Yaubada. Yaka taumi omi baha ega hita dumalu.’

Taniwaga baneihi

²⁸Lugagayo taniwagana gehouna lubayadahi anohi i nonolihi po Yesu a baha hi dumalu duma. Ega yaka lawana i nae Yesu uyahina po i lubayada i pa, ‘Yaubada a lugagayo awai i geduma?’

²⁹Ega yaka Yesu i pa, ‘Geka lugagayo baneina: taumi mi Isalaela ona lutanigana imahi, Yaubada tunawana ata Guyau. ³⁰Guyau om Yaubada luhogalam atapunei po alugom atapunei po nugonugom atapunei po omi kadidili atapunei una luhogaleya. ³¹Ma geka lugagayo wiluwagana: lawa u liyaliyam tu mae una luhogalehi po mei e lauhogalena mem.’

³²Lugagayo taniwagana Yesu a baha i nonoli po i baha i pa, ‘Bada, om baha atapuna nonolana uyahiyai i dewadewa duma po gasi hi dumalu duma matababana Yaubada tunawana ata Guyau ma ega Guyau gehouna ita memae. ³³Nugote gamogamo po ani'mbenena atapuhi ta italaguyabehi Yaubada uyahina naka ginouli habuluhi, ma ginouli baneihi naka Yaubada nugonugota

atapunei ta luhogaleya po ata hanapu atapunei ta luhogaleya. Ata kadidili atapunei ta luhogaleya ma ata lawa ta luhogalehi po mei ta lauhogalena meta.’

³⁴Yesu lawana a baha hanahanapu i nonoli yaka i pa, ‘Tam Yaubada anani taniwaga uyahinei ega uta mebala dao’. Ma lawa hi lowogeya po ega hita lubayabayadena gawahi.

Besinana lawana Dawita guguninei

³⁵Hougana Yesu i iatatiyana numa dalabu u hinena po lubayada gehouna i welehi i pa, ‘Iywai ma lugagayo tanitaniwagahi hi pa Besinana lawana naka apo Dawita gogana?’ ³⁶Ma Alugo Woiyawa nugotuhu Dawita i weleya po Besinana lawana i kawaiyugueya i pa, “Yaubada i baha u Guyau uyahina i pa, ‘U awala hinebawau una memae a sigana om gawiya a houna hopunehi po aem ani luhanatanahi.”

³⁷Noka hougana Dawita Besinana lawana i kawaguyugueya. Uyahinei Dawita ega Besinana lawana gogana dumana.’

Bolu Yesu a baha hi nonoli po hi kaoha duma.

Yesu lugagayo tanitaniwagahi i kawaiapapoenihi

³⁸Ma a wiatiyana uyahinei i paliwelehi i pa, ‘Lugagayo tanitaniwagahi ona gagalena imahiyehi. Tauhi hai luhogala ipa lului daodaohi hina otenihi ma hina nanae, ma ani gimala dobuna uyahina lawa wiyateyategei hina maamalihi. ³⁹Tauhi hai luhogala hoi numa dalabu ani tugula dewadewahi po hoi toleha hai ani tugula gegehi. ⁴⁰Ma koyamagei hiwahiwape hai numa gapolahi he danedanenehi ma lupali daodaohigei galena koyakoyama he dewadewaya. Tauhi hai wimeiha apo ina lata duma.’

Hiwape anani'mbenena

⁴¹Yesu i nei hoi numa dalabu mone ani hounana u liyaliyana i duhuduhuna, ma lawa hi yambenena ma Yesu tu wigapola hai ombenena baneihhi hi huhouna ma i gagalehi. ⁴²Ma gasi i gagalena ma hiwape wodayadayabuna mone luwaga habuluhi mei toea emosi i hounihi.

⁴³⁻⁴⁴Ma Yesu a hewahewali i boinihi ma i paliwelehi i pa, ‘A baha duma uyahimi geke hiwapena wodayadayabuna i houna lagona ma apoma atapuhina. Matababana atapuhina hai omteletelenagei hi houna ma tauna a widayadayabu u hinena ma mone atapuna i tutuhagaya i houna pahi.’

Yesu a bahapiko waisigana

13 ¹Yesu a hewahewali mitehi numa dalabu baneina uyahinei hi hopu mai po a hewali gehouna Yesu uyahina i pa, ‘Bada, numa geke galenahi hi dewadewa duma, gaima baneihhi uyahihiyehi hi dewahi’.

²Ega yaka Yesu a baha i wimiheya i pa, ‘Geka numahi gaima uyahihiyei hi dewahi po o gagalehi, houga e nenei apega gaima gehouna u uyawena ina memae. Atapuna apo hina dubadubalena pahi.’

³Yesu i gae oya Oliweta u tepana po i tugula, ma i gagalena damana Yelusalem numa dalabu baneina uyahina. Pita ma Yamesa ma Yoni ma Andulu tunawahi hi nei Yesu u liyaliyana, ⁴po hi pa, ‘Una paliweliyai om baha anona meyanai apo ina geletai? Ma wekiwekilala awai una baheya po to galeyaya yaka apo to hanapugeya ginoulihi u bahebahehi apo kikina ma hina geleta?’

⁵Ega yaka Yesu uyahihi i pa, ‘Ona gagalena imahi po ega iyai ina inepowami. ⁶Matababana lawa hi maga apo hina towolo po gowaugei hina koyama hina pa, “Tau Yaubada a Besinana lawana”, ma lawa magomagouhi hina koyamehi po hina wotagohi. ⁷Hougana gawiya po witona tuwegahi ona noonolihi ega ona matomatouta babana geke dewahi apo hina wawala tahaya. Tamogi houga sigasigana yohola. ⁸Tupo geha ma tupo geha apo hina wigawiya po ani taniwaga geha ma ani taniwaga geha apo hina wigawiya. Ma apo guhuguu tupo gehouhi uyahihi hina geleta ma gomala baneihi. Geka ginoulihi naka houga witai anani wawala dumana.

⁹Ma lawa ona galena imahiyehi, babana tauhi apo hina niyemi po hina libahibahimi hai omboina uyahihi ma hai numa dalabu uyahihi apo hina wilawimi. Ma gowau binei apo hina niyemi taniwaga baneihi po wasawasa uyahihi. Ma naka omi gaogao ipa tuwega dewadewana ona nohaya. ¹⁰Ma tuwega dewadewana ona noha tahaeya hipuli atapuna uyahihi ma apoma muliyehi houga apapoe ina geleta. ¹¹Hougana apo hina panimi po hina niyemi libahibahi binei ega ona genogeno ipa apo awai ona baheya uyahihi. Yaubada tauna apo omi baha ina woogeletaya u nugonugomi naka hougana uyahina baha awai o bahebaheya ega tunawami, ma Alugo Woiyawa apo ina wiatatiyemi omi wibaabani uyahihi.

¹²Houga naka uyahihi apo lawa walehina ina wihinigigiyeya po tanitaniwaga ina weleya po hina lihilageni mei amamahi naka pitenana apo natunatuhi hina wihinigigiyehi, apo gasi natunatuhi amamahi hina wihinigigiyehi. ¹³Apo gowau binei ma lawa atapuhi hina wihinigigiyemi. Ma apo iyawoi uyahimiyei hin'omtaibagibagi ma hina towolo kadidili po houga a siga uyahina, luyagohana apo hina tuhagaya.

¹⁴Apo yohola wekiwekilala naka ginouli waigola dumana ona galeyaya tupo waiwoiyawana uyahina e towotowolo (taumi tu'mhiyawa ona wileta po baha geke anona ona hanapugena imahiyeya) ma iyawoi Yudeya u tupona ona memae yaka ona lowo gae u oya. ¹⁵Apo tam iyai om numa uputana una memae, yaka una lowo yagiyagina, ma ega una lului hoi numa om gapola ubeihi. ¹⁶Apo tam iyai hoi tano una wobagibagi, yaka

ega om lului binei una gunagunawilem. ¹⁷Ma wiwine tu koikoiba po tu wigugu houga noka uyahina tauhi tu nugodubu. ¹⁸Ma ona laupali omi lowo houkana binei, po ega houga wayau uyahina ona nena. ¹⁹Houga witai banei dumana, babana Yaubada a wiwawala uyahinei ma i nei po amalai ega kikina witai mei geka pitenana, ma houga he nenei uyahihi apega witai hina geleta meme. ²⁰Iyeta witai noka itapa Guyau houkana ega ita likukuya apo lawa atapuhi hita hilage pahihi, ma Guyau houkana apo ina likukuya, babana a lawa i inaganihi ubeihi. ²¹Apo lawa gehouna ina paliwelemi ina pa, “Ona galeya, geka bo noka Besinana lawana”, ega ona itumaganeya, ²²Matababana Besinana koyakoyama po tu bahapiko koyakoyama apo hina geleta po wekiwekilala po manini lawa u matahi hina wogetehi, po Yaubada a bolu i inaganihi kikina apo hita koyamehi. ²³Uyahinei ona galena itete memi dewa geka uyahihi babana palihanapu atapuna amaka a bahehi uyahimi.

²⁴‘Houga witai u mulina,

“Kabudala a kadidili apo ina tapiya
ma wamaahiya yayatana ina wigahugahu.

²⁵Ma yada ubonahi apo hina peu hopu mai

ma yada ginouli atapuhi hai kadidili apo hina tapiya.”

²⁶Apoma apo Lawa Moinau anai wipoyau po anai wasawasau ona gagaleu ma yaloigei a nei. ²⁷Ma apo u tu winoyanoya a himilihi hipuli atapuna, togowa mata wohepali i nae po yada a siga uyahihi po u lawa a inaganihi hina welugogonihi po hina nei yahiu.

²⁸‘Ani galena a paliwelemi po ona nugonugotuhuya, i galugalu houkana uyahina ta hanapugeya naka ega daona ma apo higolo ina wawala. ²⁹Yaka wekiwekilala awai a palipaliwelemi hina wawala ma ona galehi yaka ona hanapugeya u houga gunawilana ega daona ma apo ina geleta babana hoi mateta a towotowolo. ³⁰A baha duma uyahimi, geka ginoulihi atapuhi apo hina wawala tahaya ma apoma geka hapanana lawahi hina hilage pahihi.

³¹Yada po hipuli apo hina yababa ma tau u baha apega ina yababa.

A houga nei kabudalana ega tata hanapugeya

³²‘Iyeta awai bo kabudala gaogaona awai apo a gunagunawilena meu ega iyai gehouna ita hanapugeya. Tu winoyanoya hoi yada ega hita hanapugeya, tau gasi ega ata hanapugeya; Amau tunawana i hanapugeya.

³³Uyahinei ona gagalena imahi po ega on'enido babana houga awai apo a geletai, ega ota hanapugeya. ³⁴Galenana mei bada gehouna ipa ina nae ina kadau, ma a tu bagibagi i otugehi po hai ututu i lawi. Ma emosi po emosi hai bagibagi i welehi, ma numa matetana tu galena itetena i paliweleya i pa, “Una gagalena imahi”.

³⁵‘Uyahinei ona gagalena babana ega ota hanapugeya meka houkana apo numa taniwagana ina geletai: iyeta bolinai, bo ibigei, bo uguwa

bolinai, bo malinatomtomi, bo malatomtomgei, ³⁶apo ina nei po anai enoenomi ma ina ligoholimi. ³⁷Awai a palipaliwelemi mei naka pitenana lawa atapuhi ona paliwelehi, ipa hina gagalena imahi.’

Yesu wogana hi talatalaya

14 ¹Iyeta luwaga hi otonana, ma apo Welulagona a nugohepa tolehana uyahina hina geleta, po tolehana uyahina apo palawa ega ani lihaahanana hina dewaya. Ma tu witalaguyaba babadahi po lugagayo tanitaniwagahi hi nugowilawila hi pa apo iyowai ma Yesu hina numa panipani gowadi po hina lihilageni. ²Hi ibaabani po hi pa, ‘Ega toleha u hinena Yesu ta panipani apo lawa hina wigawiyeta’.

Yesu u Betani hi wineuli

³Yesu u Betani i memae, Simona lepelo a numa uyahina hi'mam, ma wawine gehouna wedu gaimei hi dewadewayaya u hinena wakatu dimudimumuna i waya po i nei, wakatuna gowana nadi ma mihana i lata duma. I neiyai po weduna i hedali po i hiwogi Yesu unubolina po i wineuli.

⁴Ma hai bolu uyahinei gehouhi hi nugoapapoe, po hi pa, ‘Wawine geka matababana awai ma wakatu geka i dewa guyougeya? ⁵Wakatu geka emoemotana hita gimalena haleya po mihana kina handele tonuga hita waya po dayadayabu uyahihi hita welehi’, po ega yaka wawinena hi paliyeya.

⁶Yesu i baha uyahihi i pa, ‘Geka wawinena ega ona palipaliwiyalutugeya. Awai uyahiu i dewadewayaya naka i haki duma. ⁷Taumi apo dayadayabu mitehi houga magomagouna ona memae po houga awai nugonugomi yaka apo ona haguhi; ma tau apega houga daodaona ta memae. ⁸Wawinena awai i dewadewayaya naka emoemotana babana i bunabunamiu hiniu i wononogogeya apo hoi kokowaga hina huhouniu binei. ⁹A baha duma uyahimi, yohola apo tuwegau hina guuguyeya lawa atapuhi uyahihi po hina noonoli ma gasi wawine geka a bagibagi uyahiu i dewadewayaya apo hina deedeaya ani nugomomota tauna binei.’

Yudasa Yesu i nugohaleya

¹⁰Yudasa Isakaliyota Yesu a hewahewali magouhi 12 uyahihiyei i nae tu witalaguyaba babadahi uyahihi po Yesu wogana i talaya ipa ina nugohaleya. ¹¹Yudasa a baha hi nonoli ma hi kaoha labatana ma hi paliwitumaganeya hi pa, ‘Apo mone to welem’, yaka Yudasa a gaogao i bibeiha ipa iyowai ma apo Yesu ina nugohaleya.

Yesu a hewahewali mitehi hi'mam Welulagona a nugohepa tolehana

¹²Welulagona tolehana uyahina ma palawa ega ani lihaahanana ma sipi hai houga omunugohi i geleta. Yesu a hewahewali hi lubayadeya hi pa,

‘Meka tuponana u luhogaleya apo uyahina Welulagona tolehana bimgei to wononogogeya?’

¹³Yesu a hewahewali luwaga i himilihi i pa, ‘Meyagai baneina ona luiluiya hougana oloto gehouna goila talagigoilana i awawali apo ona itutuhaga, tauna ona wotagoya. ¹⁴Ma numa awai o luiluiya, numana taniwagana ona paliweleya ona pa, “Bada geka pite a baha uyahim i pa, Meka toumana hai babanoya naka uyahina apo u hewahewali mitehi Welulagona tolehana ton'ani?” ¹⁵Ma tauna apo babanoya baneina u moyana ina wiatatiyemi po uyahina ginouli atapuna ona wononogogeya ubeita.’

¹⁶Ma a hewahewali meyagai baneina hi luiluiya po Yesu awai atapuna i bahebaheya naka pitenana ma hi tuhagaya yaka hai Welulagona tolehana hi wononogogeya.

¹⁷Ma amaka aibiga, yaka Yesu a hewahewali mitehi hi nae hoi numa, hi lui po hi'mam. ¹⁸Ma hai amna uyahina ma Yesu i pa, ‘A baha duma uyahimi, uyahimiyei apo lawa gehouna ina nugohaleu tauna mitehi to'mam’.

¹⁹Yesu a baha geka binei ma hi nugodubu duma, ma emosi po emosi Yesu i laubayadeya i pa, ‘Iyai, nugote tau?’

²⁰Yesu i baha i pa, ‘Apo magoumi 12 uyahimiyei tauna mitehi gaeba emosi uyahina to wohopu gogona tauna apo ina nugohaleu. ²¹Lawa Moinau apo a hilage mei Yaubada a Buka uyahina hi gilugilumi pite ma iyai tu nugohaleu naka tauna tu nugodubu, itapa lolowa ega hita guni po ita lata apo ita haki wahaga, ma apo ina winugotootogo duma a apapoe binei.’

Guyau a am

²²Hai am uyahina ma Yesu aniani i waya po i wimaamala ma i tomutomuya po a hewahewali i welewelehi ma i ibaabani i pa, ‘Geka hiniu ona waya’.

²³Mei gasi keyaka i waya, po i wimaamala, ma i welehi po atapuhi hi uma.

²⁴Yesu i baha i pa, ‘Geka talau lawa atapuhi ubeihi Yaubada a wogatala binei apo ina kololo. ²⁵A baha duma uyahimi amalai ma i wawala po i nena apega wine a umaya a sigana Yaubada anani taniwaga uyahina wine wouna apo tan'umaya.’

²⁶Ega yaka hi lulougo ma hi hopu po hi gae Oliweta oyana uyahina.

Yesu Pita a bowi i paligeletaya

²⁷Yesu i baha nae uyahihi i pa, ‘Atapumi apo ona lowo haleu, mei Yaubada a Buka i bahebaheya i pa,

“Tu galena itete sipi ana ilawi

ma sipi magomagouhi hina nohanoha mehi.”

²⁸Ma u towolo meme u mulina apo a tahatahaya nae u Galili ma taumi muliugei ona nei.’

²⁹Pita i baha i pa, ‘Atapuhi apo hina lowo halem ma tau apega a lowo halem’.

³⁰Yesu i baha i pa, ‘A baha duma uyahim, uguwa geka uyahina kamkam olotona a tou apega ina wiluwagaya a sigana mala tonuga una bowiyeu’.

³¹Ma Pita i baha kadidili i pa, ‘Apega, apo hina laihilagenim, yaka tau gasi hina lihilageniu, apega a bowiyem’.

Ma atapuhi hi baha hi pa, ‘Tauyai gasi, apega to lowo halem’.

Yesu a lupali Gesemani uyahina

³²Tauhi hi nei tano gehouna gowana Gesemani, po Yesu a hewahewali i paliwelehi i pa, ‘Geka hotanana ona memae ma tau tupona a tunae po a lupali’. ³³Ma a hewahewali tonuga i weluwinihi naka Pita ma Yamesa ma Yoni, hai wohepali tupona hi tu nae, ma Yesu i nugohelalele duma ma gasi i nugowiyuwa. ³⁴Ega yaka i paliwelehi i pa, ‘Nugonugou i wiyuwa duma nugote kikina ma apo a hilage, uyahinei geka hotanana ona memae ma ona ggalena imahi’.

³⁵Ma Yesu i tunae tupona ma i polou hoi hipuli ma i lupali i pa, ‘Amau, emoemotam wiyuwa geka una wihaleya. ³⁶Aba, Amau, ginouli atapuna emoemotam, yaka geka wiyuwa keyakana uyahiu una wihaleya. Tau u nugotuhu hawena ma tam om nugotuhu una dewa tagoya.’

³⁷Yesu i gunawileya a hewahewali uyahihi po hi eneno ma i tuhagahi, po ega yaka Pita uyahina i baha nae i pa, ‘Simona, awai binei e eneno? Ega emoemotam kabudala gaogaona emosi una wiyaugeya? ³⁸Ona kadidili po ona laupali ipa ega ludadana ona ialoni. Alugomi i luhogala ma hinimi hi begabega.’

³⁹Yesu i gunawilena meya po a lupali i lilugo meya. ⁴⁰Ma i gunawilena meya a hewahewali uyahihi po hi eneno meme ma i tuhagahi, babana matahi hi pota duma.

⁴¹Ma a gunawilana i witonugaya, ma i baha nae i pa, ‘Iyowai yohola o eneno, ma o iyagohina, bo? Ona galeya u houga amaka i geleta po tau Lawa Moinau hina nugohaleu tu apapoe u nimahi. ⁴²Ona towolo po ta nae babana tu nugohaleu amaka e nenei.’

Yesu hi numa panipani

⁴³Yesu yohola i ibaabani ma Yudasa i geleta tauna a hewali gehouna. Ma lawa hi nenei naka tu witalaguyaba babadahi po lugagayo tanitaniwagahi po mi Yudeya hai tanitaniwaga hi himilihi po Yudasa mitehi hi nei ipa Yesu hina numa panipani, a nimagawiya gapolahi kwasikwasi po anai dabalumahi hi nei Yesu uyahina.

⁴⁴Ma Yudasa wekiwekilala gehouna uyahihi i baheya i pa, 'Apo ona gagaleu ma lawana a nae po niuna a yagoyagoni, naka tauna Yesu apo ona womomohi po ona numa panipani'. ⁴⁵Hougana hi geleta po Yudasa Yesu uyahina i nena ma i pa, 'U Guyau', ma i tala hagauya. ⁴⁶Ma tu wigawiya hi nei po Yesu hi womomohi. ⁴⁷Ma Yesu a bolu uyahihiyei lawa gehouna a kwasikwasi i holi po tu witalaguyaba hai taniwaga a tu bagibagi i lubuya po tanigana i talutuiya.

⁴⁸Yesu bolu i paliwelehi i pa, 'Iyowai po a nimagawiya gapolami o nei biugei mei tau tu danene? ⁴⁹Ma lolowa iyeta emosi hoi numa dalabu baneina uyahina a iatatiyana u hayami ma ega ota paniu, ma Yaubada a Buka odubona i bahebaheya geka amaka u houga i geleta.' ⁵⁰Ega yaka Yesu a hewahewali atapuhi hi lowo haleya.

⁵¹Ma hewali gehouna i lukaleko hota ma Yesu i witulani, po tu wigawiya nugonugohi ipa hina womomohi, po hi tapeilowoya. ⁵²Ma a kaleko hi teinagagi ma hipun'awa i lowo.

Yesu hi libahibahi

⁵³Ma tu wigawiya Yesu hi niyeya, po hi luyeyea tu witalaguyaba hai taniwaga anu numa. Numana uyahina tu witalaguyaba babadahi po mi Yudeya hai tanitaniwaga po lugagayo tanitaniwagahi hi'mboina po ipa Yesu hina luhetaleya. ⁵⁴Ma Pita mulinei i wotago po i nae tu witalaguyaba hai taniwaga a numa u gali hinena, po mayau i ebepala i galeya. Ma numana tu galena itetena hi lalana yaka i nae uyahihi po i tugula ma ipa ina wilalana.

⁵⁵Ma tu witalaguyaba babadahi po tu wiwogatala atapuhi Yesu hi igouya ipa iyowai ma a baba awai hina tuhagaya po hin'uni ma ega hita tuhagaya. ⁵⁶Ma tu wigou koyakoyamahi hai wibaabani ega hita dumalu, babana lawa luwaga ega hai baha emosi.

⁵⁷Ega yaka lawa gehouhi hi towolo po Yesu hi wigou koyakoyameya tanitaniwaga u matahi, hi pa, ⁵⁸'Yesu iyeta gehouna to nonoli ma i pa, "Numa dalabu geka lawa hi wogowogoya apo a hoe haleya ma iyeta tonuga u hinena a wogo meya, ega lawa nimahiyei?'" ⁵⁹Po lawa hai wibaabani ega galenahi emosi, yamoha po yamoha a nugotuhu.

⁶⁰Ega yaka tu witalaguyaba hai taniwaga i towolo u hayahi po i baha i pa, 'Iyowai? Ega emoemotana po noka lawahi hai wigou una wimiheya?' ⁶¹Ma Yesu ega ponana ma i genuwana.

Ega yaka tu witalaguyaba hai taniwaga i lubayada meme i pa, 'Iyowai, tam Besinana lawana, Yaubada Natuna, bo?'

⁶²Yesu a baha i wimiheya i pa, 'Ee, tau Lawa Moinau, ma yohola apo Tu maninidumana u awala hinebawana a tugutugula, ma ona gagaleu ma yaloi uyahinei a hopu mai?'

⁶³Uyahinei tu witalaguyaba hai taniwaga uyona i gigai ma a kaleko i loloya ma i baha i pa, 'A baha amaka o nonoli? Amaka ma ega tu wigou

hina ibaabani a powa binei, ⁶⁴babana a baha widiboga Yaubada uyahina amaka ta nonoli, ma omi nugotuhu awai Yesu binei?’

Ega yaka a boluhi hi pa, ‘A baha powa binei ina hilage’.

⁶⁵Ega yaka Yesu hi howaya, ma matana hi humaya kalekoge ma hi launawatatani hi pa, ‘Una wipiko iyai e ilawim?’ Ma tu wigawiya hi numa panipani po hi lawi ma hi niyeya.

Pita a bowi koyakoyama

⁶⁶Ma Pita mayau uyahina i lalana, ma tu witalaguyaba hai taniwaga a tu poula wawinena i nei, ⁶⁷po Pita i gagaleya ma i lalana yaka i pa, ‘Tam Yesu lawa Nasaletagei a bolu’.

⁶⁸Ma Pita i bowi i pa, ‘Om wibaabani ega ata hanapugeya’.

Ega yaka Pita i lowo hopu gali matetana u liyaliyana. ⁶⁹Ma wawinena Pita i gagaleya mateta u liyaliyana i towotowolo, ma lawa hi lalana i paliwelehi i pa, ‘Noka lawana naka Yesu a hewali gehouna’.

⁷⁰Ma Pita i nonoli yaka i bowi meme i pa, ‘Tau eega’.

Ega yaka lawa hi towotowolo u liyaliyana hi pa, ‘Moina dumana, tam Yesu a bolu babana tam lawa Galiligei’.

⁷¹Ega yaka Pita i wigwala labatana i pa, ‘U gwala amau, naka lawana binei o ibaabani, tau ega ata hanapugeya’.

⁷²Hougana naka kamkam olotona a tou i luwagaya, ma Yesu a baha Pita nugonei i gae, Yesu a baha i pa, ‘Kamkam olotona a tou apega ina wiluwagaya a sigana mala tonuga una bowiyeu’. Pita i nugotuhuya ma i tou duma.

Yesu i luhetala Pilato u matana

15 ¹Malatomtom kikina tu witalaguyaba babadahi po mi Yudeya hai tanitaniwaga po lugagayo tanitaniwagahi po tu wiwogatala atapuhi hi lueeneya yaka Yesu hi numa panipani po hi niyeya Pilato uyahina.

²Pilato mi Loma hai gawana tauna Yesu i lubayadeya i pa, ‘Tam mi Yudeya hai wasawasa, bo?’

Yesu i pa, ‘Tam om baha naka pite’.

³Ma tu witalaguyaba babadahi Yesu ginouli atapuna uyahinei hi wigouya. ⁴Ega yaka Pilato Yesu i lubayadena meya i pa, ‘Ega om baha awai hi goum ginouli atapuhi ubeihi?’

⁵Ma Yesu i genuwana, yaka Pilato nugonugona i goholi.

Yesu a hilaga tuwegana

⁶Bolima emosi po emosi Welulagona tolehana uyahina lawa hoi numa panipani he memae ma bolu lawa awai hai luhogala uyahina apo hina winagani yaka gawana lawana apo ina lupena haleya hoi numa pani.

⁷Bolima geke Welulagona tolehana iyetana ma hoi numa panipani lawa gehouna i memae gowana Balaba tauna witona i liwawali po omunugo binei hoi numa panipani i memae. ⁸Bolu hi'mboina nae Pilato uyahina, po hi baha hi pa, 'Nugonugoiyai lawa gehouna una lupena haleya hoi numa panipani'.

⁹Ega yaka Pilato hai baha i wimiheya i pa, 'O luhogaleya mi Yudeya omi wasawasa a lupena haleya, bo?' ¹⁰Pilato hai matababana amaka i galena tuhagaya, naka tu witalaguyaba babadahi, Yesu hi'mngenagenaliliyeya yaka hi numa panipani po ipa hina lihilageni. ¹¹Tu witalaguyaba babadahi lawa u nugonugohi hi wohouni ipa Balaba ina lupena haleya.

¹²Pilato i lubayada meme i pa, 'Awai nugonugomi ipa mi Yudeya omi wasawasa uyahina a dewaya?'

¹³Bolu atapuhi hi otu labatana hi pa, 'Una witakeya!'

¹⁴Pilato i lubayada i pa, 'Ma powa awai i dewaya?'

Ma bolu hi otu meme hi pa, 'Una witakeya!'

¹⁵Pilato nugonugona ipa bolu ina winugohegoyahi. Pilato i baha po Balaba hi lupena haleya ma Yesu hi wilawi ma ipa hina niyeya po hoi ani take hina tutu lawiteya.

Tu wigawiya Yesu hi lauguyoguyougeya

¹⁶Ega yaka mi Loma hai tu wigawiya Yesu hi luiyeya taniwaga a numa baneina u hinena, ma tu wigawiya hai bolu atapuna hi'mboina gogona mai Yesu uyahina. ¹⁷Ma tu wigawiya Yesu tu wasawasa hai lului hi wiluiya, ma a unuhau gologolowa waidonadonana hi dewaya po u unununa hi houni. ¹⁸Ma Yesu hi lauguyoguyougeya hi pa, 'Tinani tam mi Yudeya hai wasawasa'. ¹⁹Ma unubolina hi kodili digona uyahinei, ma hi howaya ma hi tupolou po hi wotalagae koyakoyama. ²⁰Hi luguyoguyougena woloeya ma wasawasa hai lului hi wihaleya ma tauna a kaleko dumana hi wiluiya, ma hi niniyeya ipa hina witakeya.

Yesu hi tutulawiteya hoi ani take

²¹Tahayagei hi nena po lawa gehouna hi tuhagaya, gowana Simona tanogei i nenei ipa ina nae meyagai baneina uyahina. Ma tu wigawiya hi utani po Yesu anani take i awali. Simona tauna lawa Sailinagei natunatuna ololotohi luwaga Alesana ma Lupasi. ²²Yesu hi niyeya oya gowana Gologota, a bui naka 'Ununu Dobuna'. ²³Ega yaka wine mulamula waigolana mitehi hi wila emoteya ma hi weleya, ma Yesu wine noka i wihinigigiyeya. ²⁴Ma Yesu hoi ani take hi tutulawiteya ma a kaleko hi wikibugehi po hi tamihi.

²⁵Hougana Yesu hi tutulawiteya ani take uyahina mei iyeta bolina ina lauliyaliyani. ²⁶Tauna ani wigouna hi giluma geleteya hi pa,

GEKA MI YUDEYA HAI WASAWASA. ²⁷⁻²⁸Tu danene luwaga mitehi hi witake gogonehi gehouna u awala hinebawana ma gehouna u awala kehana. ²⁹Lawa liyaliyanei hi nena ma hi bahabaha gae ma hi ununu kwadikwadiyana, ma hi palipaliyeya hi pa, 'Ee, u baha u pa emoemotam apo numa dalabu una hoe haleya, ma iyeta tonuga u hinena una wogomeya. ³⁰Heki, tam una luyawihi mem po ani takegei una hopu.'

³¹Ma tu witalaguyaba babadahi po lugagayo tanitaniwagahi tunawahi ma Yesu hi inameya hi pa, 'Lawa gehouhi i wiluyagohanihi ma iyowai po tauna ega ita wiluyagohana meya? ³²Itapa tauna Besinana lawana po mi Yudeya ata wasawasa, heki, geka hougana ani take uyahinei ita hopu mai po tata galeyama ma tata witumaganeya.' Tu danene luwaga Yesu mitehi hi take gogonehi tauhi gasi Yesu hi widibogi.

Yesu i hilage

³³Iyeta i lautipolini ma kabudala lalana i wohouni po tupo atapuna i uguguwi a sigana kabudalana i hopu po ibiga i lutipolini. ³⁴Houga noka uyahina Yesu i otu i pa, 'Eloi, Eloi, lama Sabatani?', anona 'U Yaubada, U Yaubada, awai binei u wihinigiyeu?'

³⁵Ma lawa gehouhi u liyaliyana hi towotowolo, geka bahana hi nonoli po hi pa, 'Geka lawana Elaisiya e ototugeya.'

³⁶Ega yaka lawa gehouna uyahihiyei i bulili nae po baloi i waya po wine waitululuwana uyahina i wiyoli ma hige uyahinei i tupahige ya po i wiyoyoga giye ya u gamona ipa ina hanaguguya, ma i pa, 'Heki, ona wohouna ma tana iononana ma apo Elaisiya ina nei po ina wiluyagohani.'

³⁷Yesu ponana i lata apoma i hilage.

³⁸Ma numa dalabu baneina u hinena kaleko baneina i taketake i gunalolo luwageya, u moyana ma i hopu po u babana. ³⁹Ma tu wigawiya hai taniwaga, Yesu u naona i towotowolo ma i gagaleyama, ma Yesu a otu i nonoli, u mulina apoma i hawalele, yaka lawana i kawamoina i pa, 'Baha dumana geka lawana Yaubada Natuna.'

⁴⁰Wiwine gehouhi uheiya hi towolo ma hi gagalena nae. Gehouna gowana Maliya Magadalagei ma gasi Maliya gehouna tauna Yamesa a walige ha ma walehina Yosa hinahi, ma Salome. ⁴¹Geka wiwinehi tauhi Yesu hi wotagoya po hi haguha guya a wiwila tupo Galili uyahina. Ma gasi wiwine gehouhi Yesu mitehi Galiligei hi nei Yelusalem, tauhi Yesu a hilage matahiyei hi galeyama.

Yesu hoi kokowaga hi houni

⁴²Amaka aibiga po hai wononogo iyetana mi Yudeya hai dalabu binei.

⁴³Ega yaka Yosepa Alimatiyagei i nei, tauna mi Yudeya hai tu wiwogatala dewadewana, ma i otonana Yaubada a taniwaga a houga nei. Yosepa tauna lawa nugonugomotuna yaka i nae Pilato uyahina po Yesu hinina

i lupaliyeya ipa ina waya. ⁴⁴A baha uyahina ma Pilato i goholi, po i pa, ‘Moina amaka i hilage?’

Ega yaka Pilato gawiya taniwagana i himili ipa Yesu a hilage ina limoineya. ⁴⁵Ega yaka gawiya taniwagana i baha i pa, ‘Ee, amaka i hilage’. Apoma hinina i palihaleya Yosepa uyahina. ⁴⁶Apoma hoi ani take i telehopuneya po kokowaga kalekonei i humaya. Kokowagana naka tapatapana hi hedali po i lui. Ma guduna gaima baneina, hi buiui po matetana hi lutomgeya. ⁴⁷Ma wiwine luwaga hi gagalehi ma Yesu hi houni hoi kokowaga, naka Maliya i nei Magadalagei, ma a waligeha Yosa hinana.

Yesu i towolo meme

16 ¹Mi Yudeya hai dalabu iyetana i kokoe ma malatomtomgei Maliya Magadala, ma a waligeha tauna Yamesa hinana, ma Salome, geke wiwinehi bunama dimudimumuna hi gimalaya po ipa Yesu hinina hina wineuli. ²Malatomtom kikina, gaogao a iyeta tahatahayana uyahina kabudala i gelegeleta ma wiwinehi hi nae Yesu kokowagana uyahina. ³Tahayagei hi nena ma tunawahi hi ibaabani hi pa, ‘Iyawoi hita haguta po gaima hita beuli kokowaga matetanei?’

⁴Hougana hi geleta kokowaga uyahina, ma hi galena nae po gaimana hi gagaleya naka amaka hi beula liyeni kokowaga matetanei. ⁵Yaka wiwinehi hi lui kokowaga u hinena, ma hewali gehouna a lului wakewakekena u awala hinebawana i tugutugula, ma hi matouta duma. ⁶Ma hewalina i paliwelehi i pa, ‘Ega ona matomatouta. Yesu lawa Nasaletagei hi tutulawiteya ani take uyahina, tauna o bibiheyaya, ega geke hotana ita memae amaka i towolo meme, anani eno o galeyaka kokoena.’ ⁷Ma hewalina i paliwelehi i pa, ‘Ona gunawilemi po ona nae, ma tuwegana a lawa ona paliwelehi, ma Pita ona paliweleya, ona pa, “Yesu e tahatahaya nae u Galili ma taumi noka hota apo ona galeyaka mei lolowa uyahimi i bahabaha pite”.’

⁸Ma wiwinehi kokowaga hinenagei hi weluhopu anai nugohelilehi po anai matoutahi hi bulibulili ma ega iyai hita paliweleya, babana matouta u nogonogohi.

[Yesu i laugeleteya a lawa uyahihi]

⁹Gaogao a iyeta tahatahayana uyahina Yesu malatomtom kikina ma i towolo meme po i lugeletena tahaeya Maliya Magadala uyahina, tauna Maliyana lolowa alugo apapoehi magouhi ⁷Yesu i lilupa hopunehi ma i dewadewa. ¹⁰Tauna tuwega i niyeya po a hewahewali i paliwelehi. Hi nugodubu po hi tutou Yesu binei. ¹¹Ma Maliya tuwega i palipaliwelehi i pa, ‘Yesu amaka i towolo meme po mitehi to witutuhaga’. Ma ega hita witumaganeya.

¹²Naka u mulina a hewahewali luwaga, tauhi tahayagei hi nena, ma Yesu i lugeleteya tepa tapunei uyahihi. ¹³Tauhi naka hi gunawilehi po hai lawa hi paliwelehi awai hoi tahaya ma hi gelegeleta. Ma hai baha ega hita witumaganeya.

¹⁴U mulina Yesu i lugeleteya a hewahewali magouhi 11 uyahihi, tauhi hi'mam ma Yesu i geleta u tipolihi po i towolo ma i paliyehi i pa, 'Awai binei u towolo meme lawa hi bahebaheya ega ota witumaganehi? Nugonugomi awai he guduguduhi?'

¹⁵Ega yaka Yesu i baha nae uyahihi i pa, 'Hipuli tupo wohepali uyahihi ona nae po tuwega dewadewana ona guguyeya lawa atapuhi uyahihi. ¹⁶Ma apo iyawoi hina witumaganu yaka ona bapatisohi po Yaubada ina wiluyagohanihi ma iyawoi ega hina witumagana yaka apo Yaubada ina kawaiapapoenihi. ¹⁷Apo iyawoi hina witumagana yaka wekiwekilala uyahihi ina geleta po gowaugei alugo apapoehi lawa uyahihi hina wiyagahi ma apo pona gehouhi uyahihiyei hina ibaabani. ¹⁸Apo mota apapoehi hina wohepahi ma apega hina wiyuwa, apo kakai hin'umahi apega hina hilage. Ma apo tu tootogo hina wotepanihi yaka hina dewadewa.'

Yesu a gae hoi yada

¹⁹Guyau Yesu a baha i wikokowi a hewahewali uyahihi, ma i gae hoi yada po Yaubada u awala hinebawana i tugula. ²⁰Yesu a hewahewali hi hopu po hi nae tupo atapuhi uyahihi hi luguguya, ma Guyau a baha i laimoineya wekiwekilala uyahihiyei.]